

Die Blye Tyding volgens

Marhko

Outeur : **Marhko (seun van Petrho).**
Aan : **Gelowiges uit die Nasies.**
Rede : **Om die groot werk van IESO te Eer.**
Geskrywe in : **Jerusalem**
Geskryf tussen : **63-70 CE**

Voorwoord

Die begin van hierdie boek beskryf dit as “die Blye Tyding van IESO die Gesalfde, die Seun van Aleim”. Die wonders van IESO word sterker op die voorgrond gestel as Sy woorde om so die aandag te vestig op IESO se Hemelse gesag. Die verhaal gee nie die chronologiese orde van gebeurtenisse nie, maar bied grepe uit IESO se optrede: Galilea, die noordelike streke, op pad na Jerusalem toe, en dan in Jerusalem. Gaandeweg leer die leser vir IESO ken as die lydende Seun van die mens wat Sy lewe gegee het as losprys vir die sonde van baie, en die boek bereik sy hoogtepunt by die houtpaal waar die Romeinse offisier uitroep: “Hierdie man was werklik die Seun van Aleim”. Dit word bevestig deur IESO se opstanding.

IESO begin Sy Bediening.

(Matthaio. 3: 1-12; Louka. 3: 1-18; Ioanne. 1: 19-28)

1 Die begin van die Blye Tyding van IESO die Gesalfde, die Seun van Aleim.

2 Soos geskrywe is in die Profete:

“Kyk, Ek stuur My boodskapper voor
 U aangesig, wat U pad voor U uit sal
 regmaak—

3 die stem van een wat roep in die
 woestyn: Berei die weg van die
 Regeerder, maak Sy paaie reguit!”
Malaki. 3:1; Esaia. 40:3 LXX & MT

4 Ioanne het gekom en was besig om in die woestyn te doop en die doop van bekering tot vergifnis van sondes te verkondig.

5 En die hele Joodse land en die inwoners van Jerusalem het uitgegaan na hom toe, en almal is deur hom gedoopt in die Jordaanrivier met belydenis van hulle sondes.

6 En Ioanne was gekleed met kameelhare en ‘n leergord om sy heupe, en hy het sprinkane en wilde heuning geëet.

7 En hy het gepreek en gesê: Hy wat sterker is as ek, kom ná my, en ek is nie waardig om neer te buk en Sy skoenriem los te maak nie.

8 Ek het julle wel met water gedoopt, maar Hy sal julle doop met die Heilige Gees.

Doop en Versoeking van IESO.

(Matthaio. 3: 13-17; 4: 1 – 11; Louka. 3: 21-22; 4:1-13; Ioanne. 1: 31-34)

9 En in daardie dae het IESO van Násaret in Galiléa gekom en is deur Ioanne in die Jordaan gedoopt.

10 En dadelik toe Hy opklim uit die water, sien Hy die hemele skeur en die Gees soos ‘n duif op Hom neerdaal.

11 En daar het ‘n stem uit die hemele gekom: U is My geliefde Seun in wie Ek ‘n welbehag het.

Psalm. 2:7; 1ste MoUse.22:2;

Esaia. 42:1 LXX & MT

12 En dadelik het die Gees Hom uitgedryf in die woestyn.

13 En Hy was daar in die woestyn veertig dae lank, terwyl Hy deur die satan versoek is; en Hy was saam met die wilde diere, en die engele het Hom gedien.

Roeping van die Eerste Dissipels.

(Matthaio. 4: 12-25; Louka. 5: 1-11)

14 En nadat Ioanne oorgelewer was, het IESO in Galiléa gekom en die Blye Tyding van die koninkryk van Aleim verkondig

15 en gesê: Die tyd is vervul en die koninkryk van Aleim het naby gekom; bekeer julle en glo die Blye Tyding.

16 En terwyl Hy langs die see van Galiléa loop, sien Hy Simon en Andree, sy broer, besig om ‘n net in die see uit te gooi; want hulle was vissers.

17 En IESO sê vir hulle: Kom agter My aan, en Ek sal maak dat julle vissers van mense word.

18 En dadelik het hulle hul nette laat staan en Hom gevolg.

19 En toe Hy daarvandaan ‘n bietjie verder gaan, sien Hy Iakobo, die seun van Zebedαιο, en Ioanne, sy broer, wat besig was om die nette in die skuit heel te maak.

20 En dadelik het Hy hulle geroep, en hulle het hul vader Zebedαιο met die gehuurde mense in die skuit laat staan en Hom gevolg.

Genesing van ‘n besetene in Kapérnaüm.

(Louka. 4: 31-37)

21 En hulle het in Kapérnaüm gekom, en dadelik op die sabbat het Hy in die sinagoge ingegaan en begin leer.

22 En hulle was verslae oor Sy leer, want Hy het hulle geleer soos een wat gesag het en nie soos die skrifgeleerdes nie.

23 En daar was in hulle sinagoge ‘n man met ‘n onreine gees; en hy het uitgeskreu

24 en gesê: Hou op! Wat het ons met U te doen, IESO, Nasaréner? Het U gekom om ons te verdelg? Ek ken U, wie U is: die Heilige van Aleim!

25 En IESO het hom bestraf en gesê: Bly stil en gaan uit hom uit!

26 En die onreine gees het hom stuiptrekkings laat kry en met ‘n groot stem geskreu en uit hom uitgegaan.

27 En almal was verbaas, sodat hulle onder mekaar vra en sê: Wat is dit? Watter nuwe leer is dit, dat Hy met gesag ook aan die onreine geeste bevel gee en hulle Hom gehoorsaam is?

28 En die gerug aangaande Hom is dadelik versprei in die hele omtrek van Galiléa.

Genesing van die Skoonmoeder van Petrho en ander siektes.

(Matthaio. 8: 14-17; Louka. 4: 38-41)

29 En dadelik toe hulle uit die sinagoge uitgegaan het, kom hulle saam met Iakobo en Ioanne in die huis van Simon en Andrhea.

30 En die skoonmoeder van Simon het siek gelê aan die koors; en dadelik het hulle Hom van haar gesê.

31 Daarop gaan Hy na haar, neem haar hand en rig haar op, en dadelik het die koors haar verlaat, en sy het hulle bedien.

32 En toe dit aand geword het en die son onder was, het hulle na Hom gebring almal wat ongesteld en van duiwels besete was.

33 En die hele stad het by die deur saamgekom.

34 En baie wat aan allerhande siektes gely het, het Hy gesond gemaak en baie duiwels uitgedryf en die duiwels nie toegelaat om te praat nie, omdat hulle Hom geken het.

35 En vroeg in die môre, nog diep in die nag, het Hy opgestaan en uitgegaan en na 'n eensame plek vertrek en daar gebid.

36 En Simon en die wat by hom was, het Hom gevolg.

37 En toe hulle Hom vind, sê hulle vir Hom: Almal soek U.

38 En Hy sê vir hulle: Laat ons na die naburige dorpe gaan, sodat Ek ook daar kan preek; want daarvoor het Ek uitgegaan.

39 En Hy het die hele Galiléa deur in hulle sinagoges gepreek en die duiwels uitgedryf.

Genesing van 'n melaatse.

(Matthaio. 8: 1-4; Louka. 5: 12-14)

40 En daar kom 'n melaatse na Hom toe wat Hom smeeke en voor Hom op die knieë val en vir Hom sê: As U wil, kan U my reinig.

41 En IESO het vir hom innig jammer gevoel en die hand uitgesteek en hom aangeraak en vir hom gesê: Ek wil, word gereinig!

42 En toe Hy dit sê, het die melaatsheid hom dadelik verlaat, en hy is gereinig.

43 En nadat Hy hom ernstig aangespreek het, stuur Hy hom dadelik weg.

44 en sê vir hom: Pas op dat jy aan niemand iets vertel nie, maar gaan vertoon jou aan die priester en offer vir jou reiniging wat MoÛse voorgeskryf het, tot 'n getuienis vir hulle.

45 Maar hy het uitgegaan en begin om baie dinge rond te vertel en die saak rugbaar te maak, sodat Hy nie meer openlik in 'n stad kon ingaan nie; maar Hy was buite in verlate plekke, en hulle het van alle kante na Hom gekom.

IESO is Regeerder van Genesing en van die Sabbath.

2 En ná 'n paar dae het Hy weer in Kapérnaüm gekom, en die mense het gehoor dat Hy in die huis was.

2 En dadelik het baie saamgekom, sodat daar selfs by die deur nie meer plek was nie; en Hy was besig om aan hulle die

Woord te verkondig.

Die Verlamde man in Kapérnaüm.

(Matthaio. 9: 1-8; Louka. 5: 18-26)

3 En daar kom mense na Hom met 'n verlamde man wat deur vier gedra word.

4 En toe hulle vanweë die skare nie naby Hom kon kom nie, maak hulle die dak oop waar Hy was, en nadat hulle dit oopgebreek het, het hulle die bed waar die verlamde op lê, laat afsak.

5 En toe IESO hulle geloof sien, sê Hy vir die verlamde: Seun, jou sondes is jou vergewe!

6 En sommige van die skrifgeleerdes het daar gesit en in hulle harte geredeneer:

7 Waarom praat hierdie man so Hemeltergend? Wie kan sondes vergewe behalwe Een, naamlik Aleim?

8 En IESO het dadelik in Sy gees geweet dat hulle by hulleself so redeneer, en Hy sê vir hulle: Wat redeneer julle oor hierdie dinge in jul harte?

9 Wat is makliker, om vir die verlamde te sê: Die sondes is jou vergewe! of om te sê: Staen op en neem jou bed op en loop?

10 Maar dat julle kan weet dat die Seun van die mens mag het om op die aarde sondes te vergewe—sê Hy vir die verlamde man:

11 Ek sê vir jou: Staen op, neem jou bed op en gaan na jou huis toe.

12 En dadelik staan hy op en neem sy bed op en gaan voor die oë van almal uit, sodat almal verbaas was en Aleim verheerlik en sê: So iets het ons nog nooit gesien nie!

Roeping van Leui.

(Matthaio. 9: 9-13;)

13 En Hy het weer uitgegaan langs die see, en die hele skare het na Hom gekom, en Hy het hulle geleer.

14 En toe Hy verbygaan, sien Hy Leui, die seun van Alphaio, by die tolhuis sit en sê vir hom: Volg My. En hy het opgestaan en Hom gevolg.

15 En terwyl Hy in sy huis aan tafel was, kom daar baie tollenaars en sondaars saam met IESO en Sy dissipels aan tafel; want daar was baie, en hulle het Hom gevolg.

16 En toe die skrifgeleerdes en die Fariseërs Hom saam met die tollenaars en sondaars sien eet, sê hulle vir Sy dissipels: Wat is dit dat Hy saam met die tollenaars en sondaars eet en drink?

17 En toe IESO dit hoor, sê Hy vir hulle: Die wat gesond is, het die geneesheer nie nodig nie, maar die wat ongesteld is. Ek het nie gekom om regverdiges te roep nie, maar sondaars tot bekering.

Die lering oor die vas.

(Matthaio. 9: 14-17; Louka. 3: 33-38)

18 En die dissipels van Ioanne en dié van die Fariseërs was besig om te vas. Toe kom hulle en sê vir Hom: Waarom vas die dissipels van Ioanne en dié van die Fariseërs, maar U dissipels vas nie?

19 En IESO sê vir hulle: Kan die bruilofsgaste dan vas terwyl

die bruidegom by hulle is? So lank as hulle die bruidegom by hulle het, kan hulle nie vas nie.

20 Maar daar sal dae kom wanneer die bruidegom van hulle weggeneem word, en dan sal hulle vas, in daardie dae.

21 En niemand werk 'n nuwe stuk lap op 'n ou klee nie; anders skeur sy nuwe aangelapte stuk van die oue af, en daar kom 'n erger skeur.

22 En niemand gooi nuwe wyn in ou leersakke nie; anders sal die nuwe wyn die sakke laat bars, en die wyn loop uit en die sakke vergaan. Maar nuwe wyn moet in nuwe sakke gegooi word.

Die Leer van IESO oor die Sabbat.

(Matthaio. 12: 1-8; Louka. 6: 1-5)

23 En terwyl Hy op die sabbat deur die gesaaides loop, het Sy dissipels al gaande are begin pluk.

24 Toe sê die Fariseërs vir Hom: Kyk, waarom doen hulle op die sabbat wat nie geoorloof is nie?

25 En Hy sê vir hulle: Het julle nooit gelees wat David gedoen het nie—toe hy in die nood was, en hy en die wat by hom was, honger gehad het—

26 hoe hy in die huis van Aleim gegaan het in die tyd van Abiathar, die grootpriester, en die toonbrode geëet het wat vir niemand behalwe die priesters geoorloof is om te eet nie; en ook aan die wat saam met hom was, gegee het?

27 En Hy sê vir hulle: Die sabbat is gemaak vir die mens, nie die mens vir die sabbat nie.

28 Daarom is die Seun van die mens Regeerder ook van die sabbat.

Die Regeerder se Apostels en Sy ware familie.

Die man met die Gebrekklike hand.

(Matthaio. 12: 9-14; Louka. 6: 6-11)

3 En Hy het weer in die sinagoge gegaan, en daár was 'n man met 'n gebrekklike hand.

2 En hulle het Hom in die oog gehou, of Hy hom op die sabbat gesond sou maak, sodat hulle Hom kon aanklae.

3 En Hy sê vir die man met die gebrekklike hand: Staen op in hul midde.

4 Daarop sê Hy vir hulle: Is dit geoorloof om op die sabbat goed of kwaad te doen, 'n lewe te red of dood te maak? Maar hulle het stilgebly.

5 En nadat Hy hulle rondom met toorn aangekyk het en tegelykertyd bedroef was oor die hardheid van hulle hart, sê Hy vir die man: Steek jou hand uit! En hy het dit uitgesteek, en sy hand is herstel, gesond soos die ander een.

6 Toe gaan die Fariseërs uit en hou dadelik raad met die Erhodiane teen Hom, sodat hulle Hom sou kan ombring.

7 En IESO het met Sy dissipels teruggegaan na die see toe, en 'n groot menigte het Hom gevolg uit Galiléa en Judéa

8 en Jerusalem en Iduméa en van oorkant die Jordaen af. En die wat om Tirus en Sidon gewoon het, 'n groot menigte, het na Hom gekom toe hulle hoor wat Hy alles doen.

9 En Hy het aan Sy dissipels gesê dat 'n skuitjie altyd vir Hom moes klaar lê vanweë die skare, sodat hulle Hom nie miskien sou verdring nie.

10 Want Hy het baie gesond gemaak, sodat almal wat vol kwale was, op Hom toegeloopt het om Hom aan te raak.

11 En elke keer as die onreine geeste Hom sien, het hulle voor Hom neergeval en geskreeu en gesê: U is die Seun van Aleim!

12 En Hy het hulle herhaaldelik streng gebied om Hom nie bekend te maak nie.

Roeping van die twaalf apostels.

(Matthaio. 10: 1-4; Louka. 6: 12-16)

13 En Hy het op die berg geklim en na Hom geroep die wat Hy wou hê, en hulle het na Hom gekom.

14 En Hy het twaalf aangestel, sodat hulle saam met Hom kon wees en Hy hulle kon uitstuur om te preek

15 en mag te hê om siektes te genees en die duiwels uit te dryf.

16 En aan Simon het Hy die bynaam Petrho gegee;

17 en verder Iakobo, die seun van Zebedαιο, en Ioanne, die broer van Iakobo—aan hulle het Hy die bynaam Boanérgees gegee, dit is, seuns van die donder—

18 en Andreea en Philipppo, en Bartholomaio en Matthaio, en Thoma en Iakobo, die seun van Alphaio, en Thaddaio en Simon Kananítes,

19 en Iouda Iskáriot, hy wat Hom verraa het.

Hemeltergend van die Skrifgeleerdes.

(Matthaio. 12: 22-32; Louka. 11: 14-23)

20 En hulle het in 'n huis gegaan, en 'n skare het weer saamgekom, sodat hulle selfs nie brood kon eet nie.

21 Toe Sy mense dit hoor, gaan hulle uit om Hom in die hande te kry; want hulle het gesê: Hy is buite Sy sinne.

22 En die skrifgeleerdes wat van Jerusalem af gekom het, het gesê: Hy het Beëlsebul! en: Deur die owerste van die duiwels dryf Hy die duiwels uit.

23 En Hy het hulle na Hom geroep en vir hulle deur gelykenisse gesê: Hoe kan die satan die satan uitdryf?

24 En as 'n koninkryk teen homself verdeeld is, kan daardie koninkryk nie bly staan nie;

25 en as 'n huis teen homself verdeeld is, kan daardie huis nie bly staan nie;

26 en as die satan teen homself opstaan en verdeeld is, kan hy nie bly staan nie, maar hy kom tot 'n einde.

27 Niemand kan in die huis van 'n sterk man ingaan en sy goed roof as hy nie eers die sterk man boei nie; en dan sal hy sy huis berowe.

28 Amen Ek sê vir julle, al die sondes sal die mensekinders vergewe word en al die lasteringe wat hulle mag uitgespreek het;

29 maar wie teen die Heilige Gees gelaster het, het geen vergifnis tot in ewigheid nie, maar is skuldig aan die ewige oordeel—

30 omdat hulle gesê het: Hy het 'n onreine gees.

Die Familie van IESO.

(Matthaio. 12: 46-50; Louka. 8: 19-21)

31 Sy broers en Sy moeder het toe gekom, en terwyl hulle

buite staan, stuur hulle na Hom om Hom te roep.

32 En 'n skare het rondom Hom gesit. Hulle sê toe vir Hom: U moeder en U broers soek U daarbuite.

33 En Hy antwoord hulle en sê: Wie is My moeder of My broers?

34 En Hy kyk rond na die wat rondom Hom sit, en sê: Dáár is My moeder en My broers!

35 Want elkeen wat die wil van Aleim doen, dié is My broer en My suster en moeder.

Die Gelykenisse van die Koninkryk van Aleim.

4 En Hy het nog 'n maal by die see begin leer; en 'n groot menigte het by Hom saamgekom, sodat Hy in die skuit geklim en op die see gaan sit het, en die hele skare was op die land by die see.

2 En Hy het hulle baie dinge geleer deur gelykenisse en vir hulle in Sy lering gesê:

Gelykenis van die Saaier.

(Matthaio. 13: 1-23; Louka. 8: 4-15)

3 Luister! 'n Saaier het uitgegaan om te saai.

4 En terwyl hy saai, het 'n deel langs die pad geval, en die voëls van die hemel het gekom en dit opgeëet.

5 En 'n ander deel het op 'n rotsagtige plek geval waar dit nie baie grond gehad het nie; en dadelik het dit opgekom, omdat dit geen diepte van grond gehad het nie.

6 En toe die son opgaan, is dit verskroei; en omdat dit geen wortel gehad het nie, het dit verdroog.

7 En 'n ander deel het in die dorings geval, en die dorings het opgekom en dit verstik; en dit het geen vrug opgelewer nie.

8 En 'n ander deel het in die goeie grond geval, en dit het vrug opgelewer; want dit het opgekom, en gegroei, en dit het gedra: een dertig— en een sestig— en een honderdvoudig.

9 En Hy sê vir hulle: Wie ore het om te hoor, laat hom hoor.

10 En toe Hy alleen was, het die wat saam met die twaalf rondom Hom was, Hom na die gelykenis gevra.

11 En Hy sê vir hulle: Aan julle is dit gegee om die verborgenheid van die koninkryk van Aleim te ken, maar vir hulle wat buite is, kom alles deur gelykenisse,

12 sodat hulle kan kyk en kyk, en nie sien nie; en hoor en hoor, en nie verstaan nie, dat hulle hul nie miskien bekeer en die sondes hulle vergewe word nie.

Esaia. 6:9, 10 LXX & MT

13 En Hy sê vir hulle: Begryp julle nie hierdie gelykenis nie? En hoe sal julle al die gelykenisse verstaan?

14 Die saaiers saai die Woord.

15 En dit is hulle wat langs die pad is—waar die Woord gesaai word, maar sodra hulle dit gehoor het, kom die satan dadelik en neem die Woord weg wat in hulle harte gesaai is.

16 Net so ook is hulle by wie op rotsagtige plekke gesaai word—wat, as hulle die Woord hoor, dit dadelik met blydschap aanneem,

17 maar geen wortel in hulleself het nie; hulle is net vir 'n tyd. Later as daar verdrukking of vervolging kom ter wille van die Woord, struikel hulle dadelik.

18 En hulle by wie in die dorings gesaai word—dit is hulle wat die Woord hoor,

19 en die sorge van hierdie wêreld en die verleiding van die rykdom en die begeerlikhede in verband met die ander dinge kom in en verstik die Woord, en dit word onvrugbaar.

20 En dit is hulle by wie in die goeie grond gesaai is—hulle wat die Woord hoor en aanneem en vrugte dra: een dertig— en een sestig— en een honderdvoudig.

Gelykenis van die Lamp.

(Louka. 8: 16-18)

21 En Hy het vir hulle gesê: Die lamp kom tog nie om onder die maatemmer of onder die bed gesit te word nie. Is dit nie om op die staander gesit te word nie?

22 Want daar is niks verborge wat nie openbaar sal word nie, en daar is niks weggesteek nie of dit moet in die lig kom.

23 As iemand ore het om te hoor, laat hom hoor.

24 En Hy het vir hulle gesê: Pas op wat julle hoor; met die maat waarmee julle meet, sal vir julle gemeet word, en daar sal bygevoeg word vir julle wat hoor.

25 Want wie het, vir hom sal gegee word; en wie nie het nie, van hom sal weggeneem word ook wat hy het.

Gelykenis van die Saad.

26 En Hy het gesê: So is die koninkryk van Aleim, soos wanneer 'n mens die saad in die grond gooi;

27 en hy gaan slaap en staan op, nag en dag, en die saad spruit uit en word groot—hoe, weet hy self nie.

28 Want vanself bring die aarde vrug voort, eers 'n halm, dan 'n aar, dan die volle koring in die aar.

29 En wanneer die vrug dit toelaat,
“steek hy die sekel dadelik in, omdat die oes daar is”.

Ioel 3:13 LXX & MT

Gelykenis van die Mostertsaad.

(Matthaio. 13: 31-32; Louka. 13: 18-21)

30 En Hy het gesê: Waarmee moet ons die koninkryk van Aleim vergelyk, of met watter soort gelykenis moet ons dit voorstel?

31 Dit is soos 'n mostertsaad, wat die kleinste is van al die soorte saad op die aarde wanneer dit in die grond gesaai is;

32 en wanneer dit gesaai is, kom dit op en word groter as al die groentesoorte en maak groot takke, sodat die voëls van die hemel onder sy skaduwee nes kan maak.

33 En met baie sulke gelykenisse het Hy die Woord tot hulle gespreek volgens wat hulle kon verstaan;

34 en sonder gelykenis het Hy tot hulle nie gespreek nie; maar afsonderlik het Hy vir Sy dissipels alles uitgelê.

IESO maak die storm stil.

(Matthaio. 8: 23-27; Louka. 8: 22-25)

35 En toe dit aand geword het op daardie dag, het Hy vir hulle gesê: Laat ons oorvaar na die ander kant.

36 En hulle het die skare verlaat en Hom, net soos Hy was, saamgeneem in die skuit; en daar was ook ander skuitjies by Hom.

37 En 'n groot stormwind het opgekom, en die golwe het in die skuit geslaan, sodat dit al vol wou word.

38 Maar Hy was agter op die skuit aan die slaap op die kussing. En hulle het Hom wakker gemaak en vir Hom gesê: Regeerder, gee U nie om dat ons vergaan nie?

39 En Hy het opgestaan en die wind bestraf en vir die see gesê: Swyg, wees stil! En die wind het gaan lê, en daar het 'n groot stilte gekom.

40 Toe sê Hy vir hulle: Waarom is julle so bang? Hoe het julle dan geen geloof nie?

41 En 'n groot vrees het hulle oorweldig, en hulle het vir mekaar gesê: Wie is Hy tog, dat selfs die wind en die see Hom gehoorsaam is!

IESO Bestraf Duiwels, die Dood en Siekte.

5 En hulle het aan die oorkant van die see gekom in die land van die Gadaréners.

Die besetene van Gadara.

(Matthaio. 8: 28-34; Louka. 8: 26-39)

2 En toe Hy uit die skuit gaan, kom daar dadelik uit die grafte Hom tegemoet 'n man met 'n onreine gees,

3 wat sy verblyf in die grafte gehad het. En niemand kon selfs met kettings hom bind nie;

4 want hy was dikwels met voetboeie en kettings gebind, en die kettings is deur hom uitmekaar geruk en die voetboeie stukkend gebreek; en niemand was in staat om hom te tem nie.

5 En altyd, nag en dag, het hy aangehou om te skreeu op die berge en in die grafte en homself met klippe stukkend te slaan.

6 En toe hy IESO van ver af sien, hardloop hy en val voor Hom neer

7 en skreeu met 'n groot stem en sê: Wat het ek met U te doen, IESO, Seun van die allerhoogste Aleim? Ek besweer U by Aleim om my nie te pynig nie.

8 Want Hy het vir hom gesê: Onreine gees, gaan uit die man uit!

9 En Hy vra hom: Wat is jou naam? En hy antwoord en sê: Legio is my naam, want ons is baie.

10 Toe smee hy Hom dringend om hulle nie uit die land weg te stuur nie.

11 En dáár teen die berge het 'n groot trop varke gewei,

12 en al die duiwels het Hom gesmeek en gesê: Stuur ons in die varke, sodat ons in hulle kan vaar.

13 En IESO het hulle dit dadelik toegelaat; en die onreine geeste het uitgegaan en in die varke gevaar, en die trop—daar was omtrent twee duisend—het van die krans af in die see gestorm en in die see verdrink.

14 En die wagters van die varke het gevlug en dit in die stad en in die buitewyke vertel; en hulle het uitgekom om te sien wat daar gebeur het.

15 Toe kom hulle by IESO en sien die besetene sit, gekleed en by sy verstand—die een wat die legioen gehad het. En hulle was bevrees.

16 Die wat dit gesien het, vertel toe aan hulle hoe dit met die besetene gegaan het, en ook van die varke.

17 En hulle het Hom begin smee om weg te gaan uit hulle gebied.

18 En toe Hy in die skuit klim, het die man wat van die duiwels besete gewees het, Hom gesmeek om by Hom te kan bly.

19 Maar IESO het hom dit nie toegelaat nie, maar vir hom gesê: Gaan na jou huis na jou mense toe, en vertel hulle watter groot dinge die Regeerder aan jou gedoen het, en dat Hy jou barmhartig was.

20 En hy het weggegaan en in Dekápolis begin verkondig watter groot dinge IESO aan hom gedoen het, en almal was verwonderd.

Die dogtertjie van Iaeirho.

Die vrou wat aan bloedvloeiing gely het.

(Matthaio. 9: 18-26; Louka. 8: 41-56)

21 En toe IESO weer in die skuit oorgevaar het na die ander kant, het 'n groot menigte by Hom vergader. En Hy was by die see.

22 En daar kom een van die owerstes van die sinagoge met die naam van Iaeirho; en toe hy Hom sien, val hy aan Sy voete neer

23 en smee Hom dringend en sê: My dogtertjie is op haar uiterste; kom lê haar die hande op, sodat sy gesond kan word, en Sy sal lewe.

24 En Hy het saam met hom gegaan. En 'n groot menigte het Hom gevolg en Hom verdring.

25 En 'n sekere vrou wat twaalf jaar lank bloedvloeiing gehad het

26 en veel onder baie geneeshere gely en al haar besittings uitgegee het sonder om enige baat te vind, maar eerder erger geword het,

27 het van IESO gehoor en onder die skare van agter gekom en Sy kleed aangeraak;

28 want sy het gesê: As ek maar Sy klere kan aanraak, sal ek gesond word.

29 En dadelik het die fontein van haar bloed opgedroog, en sy het aan haar liggaam bemerk dat sy van haar kwaal genees was.

30 En dadelik toe IESO in Homself die krag gewaarword wat van Hom uitgegaan het, draai Hy Hom om onder die skare en sê: Wie het My klere aangeraak?

31 En Sy dissipels antwoord Hom: U sien dat die skare U verdring, en U sê: Wie het My aangeraak?

32 Toe kyk Hy rond om haar te sien wat dit gedoen het.

33 Die vrou, wat gevrees en gebeef het omdat sy wis wat met haar gebeur het, kom toe en val voor Hom neer en vertel Hom die hele waarheid.

34 En Hy sê vir haar: Dogter, jou geloof het jou gered. Gaan in vrede en wees van jou kwaal genees.

35 Terwyl Hy nog spreek, kom daar mense van die owerste

van die sinagoge se huis en sê: U dogter is dood. Waarom val u die Regeerder nog lastig?

36 Maar dadelik, toe IESO die woord hoor wat gespreek is, sê Hy vir die owerste van die sinagoge: Moenie vrees nie; glo net.

37 En Hy het niemand toegelaat om saam met Hom te gaan nie, behalwe Petrho en Iakobo en Ioanne, die broer van Iakobo.

38 En Hy kom in die huis van die owerste van die sinagoge en sien 'n rumoer: mense wat baie ween en huil.

39 En toe Hy binnegaan, sê Hy vir hulle: Waarom gaan julle so te kere en ween julle? Die kind is nie dood nie, maar slaap.

40 En hulle het Hom uitgelag. Maar Hy het almal uitgedryf en die vader van die kind saamgeneem en die moeder en die wat by Hom was, en ingegaan waar die kind lê.

41 Toe gryp Hy die hand van die kind en sê vir haar: Talíta, koemi! wat, as dit vertaal word, beteken: Dogtertjie, Ek sê vir jou, staan op!

42 En die dogtertjie het dadelik opgestaan en begin rondloop, want sy was twaalf jaar oud. En hulle was uitermate verbaas.

43 En Hy het hulle met nadruk beveel dat niemand dit moes weet nie, en gesê dat daar vir haar iets te ete gegee moes word.

Die Dood van Ioanne die Doper.

6 En Hy het daarvandaan weggegaan en in Sy vaderstad gekom, en Sy dissipels het Hom gevolg.

IESO in Nasaret verag.

(Matthaïo. 13: 53-56)

2 En toe dit sabbat geword het, begin Hy in die sinagoge te leer, en baie wat Hom gehoor het, was verslae en sê: Waar kry Hy hierdie dinge vandaan, en watter wysheid is aan Hom gegee, dat ook sulke kragte deur Sy hande plaasvind?

3 Is Hy nie die timmerman, die Seun van Marhia, en die broer van Iakobo en Iose en Iouda en Simon nie? En is Sy susters nie hier by ons nie? En hulle het aanstoot aan Hom geneem.

4 En IESO sê vir hulle: 'n Profeet is nie ongeërd nie, behalwe in sy vaderland en onder sy familie en in sy huis.

5 En Hy kon daar geen krag doen nie, behalwe dat Hy 'n paar siekes die hande opgelê en hulle gesond gemaak het.

6 En Hy was verwonderd oor hulle ongeloof. Daarop het Hy die dorpe rondom deurgedaan en geleer.

Die Sending van die Twaalf.

(Matthaïo. 10: 5 vv; Louka. 9: 1-6)

7 En Hy het die twaalf na Hom geroep en hulle twee-twee begin uitstuur en het hulle mag gegee oor die onreine geeste,

8 en hulle bevel gegee om niks vir die pad saam te neem nie as net 'n stok alleen—geen reissak, geen brood, geen geld in die beurs nie,

9 maar skoene aan die voete; en: Julle moet nie twee kledingstukke aantrek nie.

10 En Hy het vir hulle gesê: Waar julle ook al in 'n huis mag kom, bly dáár totdat julle daarvandaan vertrek.

11 En almal wat julle nie ontvang of na julle luister nie, gaan daarvandaan weg en skud die stof onder julle voete af tot 'n

getuienis teen hulle. Amen Ek sê vir julle, dit sal vir Sodom of Gomorra verdraagliker wees in die oordeelsdag as vir daardie stad.

12 En hulle het uitgegaan en gepreek dat die mense hulle moes bekeer.

13 En hulle het baie duiwels uitgedryf en baie siekes met olie gesalf en gesond gemaak.

Dood van Ioanne die Doper.

(Matthaïo. 14: 1-13; Louka. 3: 19,20; 9:7-9)

14 Toe koning Erhode dit hoor—want Sy naam het bekend geword—het hy gesê: Ioanne die Doper het uit die dode opgestaan, en daarom werk dié kragte in Hom.

15 Ander het gesê: Hy is Elia, en ander weer het gesê: Hy is 'n profeet of soos een van die profete.

16 Maar toe Erhode dit hoor, sê hy: Ioanne wat ek onthoof het, dit is hy; hy het uit die dode opgestaan.

17 Want Erhode self het gestuur en Ioanne gevange geneem en hom in die gevangenis geboei, vanweë Erhodia, die vrou van Philipppo, sy broer, omdat hy met haar getrou het.

18 Want Ioanne het aan Erhode gesê: Dit is u nie geoorloof om u broer se vrou te hê nie.

19 En Erhodia het 'n oog op hom gehad en wou hom om die lewe bring en sy kon nie.

20 Want Erhode was bang vir Ioanne, omdat hy wis dat hy 'n regverdige en heilige man was, en hy het hom beskerm; en nadat hy hom gehoor het, het hy baie dinge gedoen en graag na hom geluister.

21 En op die geskikte dag, toe Erhode op sy verjaarsdag vir sy groot manne en die owerstes oor duisend en die vernaamstes van Galiléa 'n maaltyd gegee het;

22 en toe die dogter van dieselfde Erhode inkom en dans, en Erhode en die wat saam aan tafel was, behaag, sê die koning vir die meisie: Vra my net wat jy wil, en ek sal dit aan jou gee.

23 En hy het vir haar gesweer: Net wat jy my vra, sal ek jou gee, al was dit ook die helfte van my koninkryk.

24 Daarop gaan sy uit en sê vir haar moeder: Wat sal ek vra? Toe antwoord sy: Die hoof van Ioanne die Doper.

25 En dadelik gaan sy haastig in na die koning en vra en sê: Ek wil hê dat u my op die daad die hoof van Ioanne die Doper op 'n skottel gee.

26 Toe word die koning baie bedroef, maar ter wille van die eed en die wat saam aan tafel was, wou hy haar nie afwys nie.

27 En die koning stuur dadelik een van sy lyfwag met die bevel om sy hoof te bring; en hy het gegaan en hom in die gevangenis onthoof

28 en sy hoof op 'n skottel gebring en dit aan die meisie gegee, en die meisie het dit aan haar moeder gegee.

29 En toe sy dissipels dit hoor, het hulle gekom en sy lyk weggeneem en dit in 'n graf neergelê.

Eerste vermeerdering van die brode.

(Matthaïo. 14: 13-21; Louka. 9: 10-17; Ioanne. 6: 1-14)

30 En die apostels het by IESO saamgekom en Hom alles vertel wat hulle gedoen sowel as wat hulle geleer het.

31 En Hy sê vir hulle: Kom julle self in die eensaamheid na

‘n verlate plek en rus ‘n bietjie. Want daar was baie wat kom en gaan, en hulle het selfs geen geskikte tyd gehad om te eet nie.

32 En hulle het met die skuit vertrek na ‘n verlate plek in die eensaamheid.

33 En die skare het hulle sien weggaan, en baie het Hom herken en te voet van al die stede af daar saamgestroom en voor hulle uit gegaan en by Hom vergader.

34 En toe IESO uitklim, sien Hy ‘n groot menigte, en Hy het vir hulle innig jammer gevoel, omdat hulle soos skape sonder herder was; en Hy het hulle baie dinge begin leer.
4de MoUse. 27:17; Izekeel. 34:5 LXX & MT

35 En toe dit reeds laat geword het, kom Sy dissipels na Hom en sê: Die plek is verlate en dit is reeds laat.

36 Stuur hulle weg, sodat hulle na die buitewyke en dorpe rondom kan gaan om brood vir hulleself te koop, want hulle het niks om te eet nie.

37 Maar Hy antwoord en sê vir hulle: Gee julle aan hulle iets om te eet. En hulle sê vir Hom: Moet ons gaan en vir twee honderd pennings brood koop en aan hulle gee om te eet?

38 En Hy sê vir hulle: Hoeveel brode het julle? Gaan kyk. En toe hulle dit te wete gekom het, sê hulle: Vyf, en twee visse.

39 En Hy het hulle beveel om almal klompies-klompies op die groen gras te laat sit.

40 En hulle het gaan sit in groepe van honderd en van vyftig.

41 Hy neem toe die vyf brode en die twee visse, kyk op na die hemel en dank; en Hy breek die brode en gee dit aan Sy dissipels om dit aan hulle voor te sit. Ook die twee visse het Hy onder almal verdeel.

42 En almal het geëet en versadig geword;

43 en hulle het van die brokstukke twaalf mandjies vol opgetel, en van die visse.

44 En die wat van die brood geëet het, was omtrent vyf duisend manne.

IESO wandel op die see.

(Matthaio.14: 22-36; Ioanne. 6: 16-21)

45 En dadelik het Hy Sy dissipels gedwing om in die skuit te gaan en vooruit te vaar na die oorkant, na Betsáida, onderwyl Hy die skare sou wegstuur.

46 En nadat Hy van hulle afskeid geneem het, het Hy na die berg gegaan om te bid.

47 En toe dit aand geword het, was die skuit in die middel van die see en Hy alleen op die land.

48 En Hy het gesien dat hulle swaar kry met roei, want die wind was teen hulle. En omtrent die vierde nagwaak het Hy na hulle gekom, al wandelende op die see. En Hy wou by hulle verbygaan.

49 En toe hulle Hom op die see sien loop, het hulle gemeen dat dit ‘n spook was en hard uitgeskreeu;

50 want hulle het Hom almal gesien en was ontsteld. Toe spreek Hy dadelik met hulle en sê vir hulle: Hou goeie moed,

dit is Ek; moenie vrees nie.

51 En Hy het by hulle in die skuit geklim, en die wind het gaan lê; en hulle was by hulleself uitermate verbaas en verwonderd.

52 Want hulle het by die wonder van die brode nie verstandig geword nie, omdat hulle hart verhard was.

53 En nadat hulle oorgevaar het, het hulle by die land Gennésaret aangekom en daar aan wal gaan lê.

54 En toe hulle uit die skuit gaan, het die mense Hom dadelik herken.

55 en hulle het in daardie hele omtrek rondgehoop en die wat ongesteld was, op bedde begin rondra na die plek waar hulle hoor dat Hy is.

56 En waar Hy ook al ingegaan het in dorpe of stede of buitewyke, het hulle die wat ongesteld was, op die markpleine neergesit en Hom gesmeek om, al was dit maar die soom van Sy kleed, aan te raak; en almal wat Hom aangeraak het, het gesond geword.

IESO bestraf die Tradisies van die Fariseërs.

(Matthaio. 15: 1-20)

7 En die Fariseërs en sommige van die skrifgeleerdes wat van Jerusalem gekom het, het by Hom saamgekom;

2 en toe hulle sommige van Sy dissipels met onrein, dit is met ongewaste, hande sien brood eet, het hulle dit afgekeur.

3 Want die Fariseërs en al die Jode eet nie as hulle nie deeglik die hande gewas het nie, omdat hulle vashou aan die oorlewering van die ou mense.

4 En wanneer hulle van die mark kom, eet hulle nie as hulle nie gewas het nie; en baie ander dinge is daar wat hulle aangeneem het om te onderhou: die wassery van bekere en kanne en kopergoed en bedde.

5 Daarop stel die Fariseërs en die skrifgeleerdes Hom die vraag: Waarom wandel U dissipels nie ooreenkomstig die oorlewering van die ou mense nie, maar eet brood met ongewaste hande?

6 En Hy antwoord en sê vir hulle: Tereg het Esaia oor julle, geveinsdes, geprofeteer soos geskrywe is:

Hierdie volk eer My met die lippe, maar hulle hart is ver van My af.

7 Maar tevergeefs vereer hulle My deur leringe te leer wat gebooie van mense is.

Esaia. 29:13 LXX & MT

8 Want terwyl julle die gebod van Aleim nalaat, hou julle aan die oorlewering van mense vas: die wassery van kanne en bekere, en ander dergelike dinge van dieselfde aard doen julle baie.

9 En Hy sê vir hulle: Julle verstaan dit goed om die gebod van Aleim opsy te sit en so julle oorlewering te onderhou.

10 Want MoUse het gesê: Eer jou vader en jou moeder; *2de MoUse. 20:12;*
5de MoUse. 5:16 en: Hy wat vader of

moeder vloek, moet sekerlik sterwe.

2de MoUse. 21:17 LXX & MT

11 Maar julle sê: As 'n mens aan vader of moeder sê: Enige voordeel wat u van my mag geniet, is korban, dit is 'n offergawe—

12 dan laat julle hom nie meer toe om iets vir sy vader of sy moeder te doen nie.

13 So maak julle dan die Woord van Aleim kragteloos deur julle oorlewering wat julle bewaar het; en dergelike dinge van dieselfde aard doen julle baie.

14 En Hy het die hele skare na Hom geroep en vir hulle gesê: Luister almal na My en verstaan.

15 Daar is niks wat van buite af in die mens ingaan wat hom onrein kan maak nie; maar die dinge wat van hom uitgaan, dit is die dinge wat die mens onrein maak.

16 As iemand ore het om te hoor, laat hom hoor!

17 En toe Hy van die skare af in 'n huis gekom het, vra Sy dissipels Hom oor die gelykenis.

18 En Hy sê vir hulle: Is julle ook so sonder verstand? Begryp julle nie dat alles wat van buite af in die mens ingaan, hom nie onrein kan maak nie,

19 omdat dit nie ingaan in sy hart nie, maar in die maag, en dit gaan in die heimlikheid uit en maak al die voedsel rein?

20 En Hy sê: Wat uit die mens uitgaan, dit maak die mens onrein.

21 Want van binne, uit die hart van die mense, kom die slegte gedagtes, egbreuk, hoerery, moord,

22 diewery, hebsug, boosheid, bedrog, losbandigheid, afguns, lastering, hoogmoed, dwaasheid.

23 Al hierdie booshede kom van binne uit en maak die mens onrein.

Die Siro-Feniciëse vrou.

(Matthaio. 15: 21-28)

24 En Hy het opgestaan en daarvandaan na die gebied van Tirus en Sidon vertrek. En toe Hy in die huis gegaan het, wou Hy nie dat iemand dit sou weet nie; maar Hy kon nie verborge bly nie.

25 Want 'n vrou wie se dogtertjie 'n onreine gees gehad het, het van Hom gehoor en gekom en voor Sy voete neergeval.

26 En sy was 'n Griekse vrou, 'n Suro-phoenician van geboorte, en sy het Hom gevra om die duiwel uit haar dogter uit te dryf.

27 Maar IESO sê vir haar: Laat eers die kinders versadig word; want dit is nie mooi om die brood van die kinders te neem en vir die hondjies te gooi nie.

28 En sy antwoord en sê vir Hom: Ja, Regeerder, maar die hondjies eet darem onder die tafel van die kinders se krummels.

29 En Hy sê vir haar: Ter wille van hierdie woord kan jy gaan; die duiwel het uit jou dogter uitgevaar.

30 En toe sy huis toe gaan, vind sy dat die duiwel uitgevaar het en dat haar dogter op die bed lê.

Genesing van 'n doofstomme in Dekapolis.

31 En Hy het weer uit die gebied van Tirus en Sidon vertrek

en na die see van Galiléa gegaan, deur die gebied van Dekápolis.

32 Toe bring hulle na Hom 'n dowe wat swaar praat, en smee Hom om hom die hande op te lê.

33 En Hy neem hom opsy, weg van die skare, en steek Sy vingers in sy ore, en spuug en raak sy tong aan;

34 en nadat Hy opgekyk het na die hemel, sug Hy en sê aan hom: Éffata, dit is: Gaan oop!

35 En dadelik het sy ore oopgegaan en die band van sy tong losgeraak, en hy het reg gepraat.

36 En Hy het hulle beveel om dit aan niemand te sê nie; maar hoe meer Hy hulle dit beveel, hoe meer hulle dit verkondig.

37 En hulle was uitermate verslae en het gesê: Hy het alles goed gedoen: die dowes laat Hy hoor en die stommes praat.

IESO voed die vier duisend.

8 In dié dae toe daar 'n baie groot menigte was en hulle niks gehad het om te eet nie, het IESO Sy dissipels na Hom geroep en vir hulle gesê:

Tweede vermeerdering van die brode.

(Matthaio. 15: 29-39)

2 Ek voel innig jammer vir die skare, omdat hulle al drie dae by My bly en niks het om te eet nie.

3 En as Ek hulle honger huis toe stuur, sal hulle op die pad beswyk, want sommige van hulle kom van ver.

4 En Sy dissipels antwoord Hom: Waarvandaan sal 'n mens hulle hier in die woestyn kan versadig met brood?

5 Toe vra Hy hulle: Hoeveel brode het julle? En hulle sê: Sewe.

6 En Hy gee aan die skare bevel om op die grond te gaan sit; daarop neem Hy die sewe brode, en nadat Hy gedank het, breek Hy dit en gee dit aan Sy dissipels om dit voor te sit; en hulle sit dit aan die skare voor.

7 Hulle het ook 'n paar vissies gehad; en nadat Hy gedank het, sê Hy dat hulle dit ook moet voorsit.

8 En hulle het geëet en versadig geword en die oorskot van die brokstukke opgetel, sewe mandjies vol.

9 En die wat geëet het, was omtrent vier duisend. En Hy het hulle weggestuur.

Die suurdeeg van die Fariseërs.

(Matthaio. 16: 1-12)

10 En dadelik het Hy met Sy dissipels in die skuit geklim en in die streke van Dalmanúta gekom.

11 En die Fariseërs het uitgegaan en met Hom begin redetwis en van Hom 'n teken uit die hemel gevra om Hom te versoek.

12 Toe sug Hy swaar in Sy gees en sê: Waarom begeer hierdie geslag 'n teken? Amen Ek sê vir julle, aan hierdie geslag sal sekerlik geen teken gegee word nie.

13 En Hy het hulle verlaat en weer in die skuit geklim en na die oorkant gegaan.

14 En hulle het vergeet om brode saam te neem, en het net een brood by hulle in die skuit gehad.

15 En Hy het hulle beveel en gesê: Pas op, wees op julle hoede vir die suurdeeg van die Fariseërs en die suurdeeg van

Erhode.

16 Toe redeneer hulle onder mekaar en sê: Dit is omdat ons geen brode het nie.

17 En IESO merk dit en sê vir hulle: Waarom redeneer julle dat julle geen brode het nie? Begryp julle nie en verstaan julle nie? Het julle nog jul verharde hart?

18 Het julle oë en sien julle nie?
En het julle ore en hoor julle nie?
Ierhmeia 5:21 LXX & MT

19 En onthou julle nie toe Ek die vyf brode vir die vyf duisend gebreek het, hoeveel mandjies vol brokstukke julle opgetel het nie? Hulle sê vir Hom: Twaalf.

20 En die sewe vir die vier duisend—hoeveel mandjies vol brokstukke het julle opgetel? En hulle sê: Sewe.

21 Toe sê Hy vir hulle: Hoe verstaan julle dan nie!

Genesing van die blinde man in Betsaida.

22 En Hy het in Betsaida gekom, en hulle het 'n blinde man na Hom gebring en Hom gesmeek om hom aan te raak.

23 Hy neem toe die blinde by die hand en lei hom uit buitekant die dorp; en nadat Hy in sy oë gespuug en hom die hande opgelê het, vra Hy hom of hy iets sien.

24 En hy kyk op en sê: Ek sien die mense, want ek sien hulle soos bome rondloop.

25 Daarna lê Hy weer die hande op sy oë en laat hom opkyk, en hy is herstel en het almal van ver af duidelik gesien.

26 En Hy het hom na sy huis gestuur en gesê: Moenie in die dorp gaan of dit aan iemand in die dorp vertel nie.

Belydenis van Petrho.

(Matthaio. 16: 13-23; Louka. 9: 18-22; Ioanne. 6: 66-69)

27 En IESO en Sy dissipels het uitgegaan na die dorpe van Cesaréa- Filippi; en op die pad vra Hy Sy dissipels en sê vir hulle: Wie sê die mense is Ek?

28 En hulle antwoord: Ioanne die Doper, en ander: Elia en ander: Een van die profete.

29 En Hy sê vir hulle: Maar julle, wie sê julle is Ek? En Petrho antwoord en sê vir Hom: U is die Gesalfde.

30 En Hy het hulle streng beveel om niemand van Hom te vertel nie.

31 Toe het Hy hulle begin leer dat die Seun van die mens baie moet ly en verwerp word deur die ouderlinge en owerpriesters en skrifgeleerdes en gedood word en ná drie dae opstaan.

32 En hierdie woord het Hy ronduit gespreek. En Petrho het Hom opsy geneem en Hom begin bestraf.

33 Maar Hy het Hom omgedraai, en terwyl Hy Sy dissipels aankyk, het Hy Petrho bestraf en gesê: Gaan weg agter My, satan! Want jy bedink nie die dinge van Aleim nie, maar dié van die mense.

Om die houtpaal op te neem.

(Matthaio. 16: 24-28; Louka. 9: 23-27)

34 En toe Hy die skare saam met Sy dissipels na Hom geroep het, sê Hy vir hulle: Wie agter My aan wil kom, moet homself

verloën en sy houtpaal opneem en My volg.

35 Want elkeen wat sy lewe wil red, sal dit verloor; maar elkeen wat sy lewe om My ontwil en om die Blye Tyding ontwil verloor, hy sal dit red.

36 Want wat sal dit 'n mens baat as hy die hele wêreld win en aan sy siel skade ly?

37 Of wat sal 'n mens gee as losprys vir sy siel?

38 Want elkeen wat hom vir My en My woorde skaam in hierdie owerspelige en sondige geslag, vir hom sal die Seun van die mens Hom ook skaam wanneer Hy kom in die heerlijkheid van Sy Vader met die heilige engele.

Die Verheerliking van die Gesalfde.

(Matthaio. 17: 1-13; Louka. 9: 28-36)

9 En Hy sê vir hulle: Amen Ek sê vir julle, daar is sommige van die wat hier staan, wat die dood sekerlik nie sal smaak voordat hulle die koninkryk van Aleim met krag sien kom het nie.

2 En ná ses dae het IESO vir Petrho en Iakobo en Ioanne saamgeneem en hulle alleen op 'n hoë berg in die eensaamheid geneem; en Hy het voor hulle van gedaante verander,

3 en sy klere het blink geword, baie wit soos sneeu, wit soos geen bleiker op aarde dit kan maak nie.

4 En daar het aan hulle verskyn Elia saam met MoUse, en hulle was in gesprek met IESO.

5 Toe spreek Petrho en sê vir IESO: Rabbi, dit is goed dat ons hier is. Laat ons dan drie hutte maak: vir U een en vir MoUse een en vir Elia een.

6 Want hy het nie geweet wat om te sê nie, want hulle was heeltemal verskrik.

7 En daar kom 'n wolk wat hulle oordek; en uit die wolk kom 'n stem wat sê: Dit is My geliefde Seun, luister na Hom! *Psalms. 2:7; 1ste MoUse. 22:2; 5de MoUse. 18:15 LXX & MT*

8 En meteens kyk hulle rond en sien niemand meer by hulle nie, behalwe IESO alleen.

9 En onderwyl hulle van die berg afklim, gee Hy aan hulle bevel om aan niemand te vertel wat hulle gesien het voordat die Seun van die mens uit die dode opgestaan het nie.

10 En hulle het die Woord vir hulleself gehou en onder mekaar gevra wat dit beteken om uit die dode op te staan.

11 En hulle vra Hom en sê: Waarom sê die skrifgeleerdes dat Elia eers moet kom?

12 Toe antwoord Hy en sê vir hulle: Dis waar, Elia kom eers om alles te herstel; en tog, hoe staan daar dan van die Seun van die mens geskrywe dat Hy baie moet ly en verag word?

13 Maar Ek sê vir julle dat Elia al gekom het, en hulle het aan hom gedoen alles wat hulle wou, soos van hom geskrywe is.

Die seun wat maansiek was.

(Matthaio. 17: 14-21; Louka. 9: 39-45)

14 En toe Hy by die dissipels kom, sien Hy 'n groot menigte om hulle, en skrifgeleerdes wat met hulle redetwis.

15 En dadelik toe die hele skare Hom sien, was hulle baie verbaas en het na Hom gehardloop en Hom gegroet.

16 Daarop vra Hy die skrifgeleerdes: Waarom redetwis julle met hulle?

17 En een uit die skare antwoord en sê: Regeerder, ek het my seun wat 'n stomme gees het, na U gebring;

18 en waar hy hom ook aangryp, skeur hy hom; en hy kry skuim in die mond, en hy kners met sy tande en word styf; en ek het U dissipels gevra om hom uit te dryf, en hulle kon nie.

19 Toe antwoord Hy hom en sê: o Ongelowige geslag, hoe lank sal Ek by julle wees, hoe lank sal Ek julle verdra? Bring hom na My toe.

20 En hulle bring hom na Hom toe; en toe hy Hom sien, laat die gees hom dadelik stuiptrekkings kry, en hy val op die grond neer en rol rond met skuim in die mond.

21 Daarop vra Hy sy vader: Hoe lank is dit al dat dit hom oorgekom het? En hy sê: Van sy kindsdae af;

22 en dikwels het hy hom selfs in die vuur en in die water gegooi om hom dood te maak. Maar as U iets kan doen, ontferm U oor ons en help ons.

23 En IESO sê vir hom: Wat dit betref—as jy kan glo, alle dinge is moontlik vir die een wat glo.

24 En dadelik roep die vader van die kind met trane uit en sê: Ek glo, Regeerder, kom my ongeloof te hulp!

25 En toe IESO sien dat 'n skare bymekaar stroom, het Hy die onreine gees bestraf en vir hom gesê: Jou stom en dowe gees, Ek gebied jou, gaan uit hom uit en kom nooit weer in hom nie.

26 En nadat hy geskreeu en hom baie stuiptrekkings laat kry het, het hy uitgegaan. En die seun het soos 'n dooie geword, sodat baie gesê het: Hy is dood.

27 Maar IESO het hom by die hand gegryp en hom opgerig; en hy het opgestaan.

28 En toe Hy in die huis kom, vra Sy dissipels Hom afsonderlik: Waarom kon ons hom nie uitdrywe nie?

29 En Hy sê vir hulle: Hierdie geslag kan deur niks anders uitgaan as deur gebed en vas nie.

Die Grootste in die Koninkryk van die Hemele.

(Matthiaio. 18: 1-14; Louka. 9: 46-48)

30 En hulle het daarvandaan weggegaan en verbygetrek deur Galiléa; en Hy wou nie hê dat iemand dit moes weet nie.

31 Want Hy het Sy dissipels geleer en vir hulle gesê: Die Seun van die mens word oorgelewer in die hande van die mense, en hulle sal Hom doodmaak; en nadat Hy gedood is, sal Hy die derde dag opstaan.

32 En hulle het die gesegde nie verstaan nie en was bang om Hom uit te vra.

33 En Hy het in Kapérnaüm gekom; en toe Hy in die huis was, vra Hy hulle: Wat het julle op die pad met mekaar geredeneer?

34 Maar hulle het stilgebly; want hulle het op die pad met mekaar gepraat oor wie die grootste is.

35 En toe Hy gaan sit het, roep Hy die twaalf en sê vir hulle: As iemand die eerste wil wees, moet hy die laaste van almal en almal se dienaar wees.

36 En Hy neem 'n kindjie en laat hom in hul midde staan en slaan Sy arms om hom en sê vir hulle:

37 Elkeen wat een van sulke kindertjies ontvang in My Naam, ontvang My. En elkeen wat My ontvang, ontvang nie My nie, maar Hom wat My gestuur het.

Wie nie teen ons is nie, is vir ons.

(Louka. 9: 49 - 50)

38 Toe antwoord Ioanne Hom en sê: Regeerder, ons het iemand gesien wat in U Naam duiwels uitdryf en wat ons nie volg nie; en ons het hom belet, omdat hy ons nie volg nie.

39 Maar IESO sê: Moet hom nie belet nie, want daar is niemand wat 'n krag in My Naam sal doen en gou van My sal kan kwaadsprek nie;

40 want wie nie teen ons is nie, is vir ons.

41 Want elkeen wat vir julle in My Naam 'n beker water gee om te drink, omdat julle aan die Gesalfde behoort, Amen Ek sê vir julle, hy sal sy loon sekerlik nie verloor nie.

Die struikelblokke.

42 En elkeen wat een van hierdie kleintjies wat in My glo, laat struikel, dit is beter vir hom as 'n meulsteen om sy nek gehang en hy in die see gegooi word.

43 En as jou hand jou laat struikel, kap dit af. Dit is beter vir jou om vermink die lewe in te gaan, as om twee hande te hê en in die hel te gaan in die onuitbluslike vuur,

44 waar

hulle wurm nie sterf en die vuur nie uitgeblus word nie.

Esaiä. 66:24 LXX & MT

45 En as jou voet jou laat struikel, kap dit af. Dit is beter vir jou om kreupel die lewe in te gaan, as om twee voete te hê en in die hel gewerp te word in die onuitbluslike vuur,

46 waar

hulle wurm nie sterf en die vuur nie uitgeblus word nie.

Esaiä. 66:24 LXX & MT

47 En as jou oog jou laat struikel, pluk dit uit. Dit is beter vir jou om met een oog die koninkryk van Aleim in te gaan, as om twee oë te hê en in die helse vuur gewerp te word,

48 waar

hulle wurm nie sterf en die vuur nie uitgeblus word nie.

Esaiä. 66:24 LXX & MT

49 Want elkeen sal met vuur gesout word en elke offerande sal met sout gesout word.

50 Die sout is goed, maar as die sout souteloos word, waarmee sal julle dit smaaklik maak? Julle moet sout in julle hê en vrede hou met mekaar.

Egskeiding en die gevaar van Rykdom.

(Matthaio. 19: 1-12)

10 En Hy het opgestaan en daarvandaan deur die oorkant van die Jordaan na die gebied van Judéa gegaan; en weer het 'n skare by Hom vergader; en soos Hy gewoon was, het Hy hulle weer geleer.

2 Toe kom die Fariseërs na Hom; en, om Hom te versoek, stel hulle Hom die vraag of dit 'n man geoorloof is om van sy vrou te skei?

3 Maar Hy antwoord en sê vir hulle: Wat het MoUse julle beveel?

4 En hulle sê: MoUse het toegelaat om 'n skeibrief te skrywe en van haar te skei.

5de MoUse. 24:1 LXX & MT

5 En IESO antwoord en sê vir hulle: Vanweë die hardheid van julle harte het hy vir julle hierdie gebod geskrywe,

6 maar van die begin van die skepping af het Aleim hulle man en vrou gemaak.

Iste MoUse. 1:27 LXX & MT

7 Om hierdie rede sal die man sy vader en moeder verlaat en sy vrou aankleef,

8 en hulle twee sal een vlees word, sodat hulle nie meer twee is nie, maar een vlees.

Iste MoUse. 2:24 LXX & MT

9 Wat Aleim dan saamgevoeg het, mag geen mens skei nie.

10 En in die huis het Sy dissipels Hom weer oor dieselfde saak gevra.

11 En Hy sê vir hulle: Elkeen wat van sy vrou skei en 'n ander een trou, pleeg egbreuk teen haar;

12 en as 'n vrou van haar man skei en met 'n ander een trou, pleeg sy egbreuk.

IESO seën die kindertjies.

(Matthaio. 19: 13-15; Louka. 18: 18-30)

13 En hulle het kindertjies na Hom gebring, dat Hy hulle kon aanraak; en die dissipels het die wat hulle gebring het, bestraf.

14 Maar toe IESO dit sien, het Hy hulle dit baie kwalik geneem en vir hulle gesê: Laat die kindertjies na My toe kom en verhinder hulle nie, want aan sulkes behoort die koninkryk van Aleim.

15 Amen Ek sê vir julle, elkeen wat die koninkryk van Aleim nie soos 'n kindjie ontvang nie, sal daar nooit ingaan nie.

16 En Hy het Sy arms om hulle geslaan, Sy hande op hulle gelê en hulle geseën.

Die ryk jongman.

(Matthaio. 19: 16-30; Louka. 18: 31-30)

17 En toe Hy op die pad uitgaan, hardloop daar een na Hom toe en val voor Hom op die knieë en vra Hom: Goeie Regeerder, wat moet ek doen om die ewige lewe te beërwe?

18 En IESO sê vir hom: Waarom noem jy My goed? Niemand is goed nie, behalwe Een, naamlik Aleim.

19 Jy ken die gebooie:
Jy mag nie egbreek nie,
jy mag nie doodslaan nie,
jy mag nie steel nie,
jy mag geen valse getuienis gee nie,
jy mag niemand te kort doen nie;
eer jou vader en jou moeder.
2de MoUse. 20:12-16 LXX & MT

20 Maar hy antwoord en sê vir Hom: Regeerder, al hierdie dinge het ek onderhou van my jeug af.

21 En IESO het hom aangekyk en hom liefgekry en vir hom gesê: Een ding kom jy kort—gaan verkoop alles wat jy het, en gee dit aan die armes, en jy sal 'n skat in die hemel hê; kom dan hier, neem die Paal op en volg My.

22 Maar hy het treurig geword oor dié woord en bedroef weggegaan, want hy het baie besittings gehad.

23 Toe kyk IESO rond en sê vir Sy dissipels: Hoe beswaarlik sal hulle wat goed besit, in die koninkryk van Aleim ingaan!

24 En die dissipels was verbaas oor Sy woorde; maar IESO antwoord weer en sê vir hulle: Kinders, hoe swaar is dit vir die wat op hulle goed vertrou, om in die koninkryk van Aleim in te gaan!

25 Dit is makliker vir 'n kameel om deur die oog van 'n naald te gaan as vir 'n ryk man om in die koninkryk van Aleim in te gaan.

26 En hulle was uitermate verslae en het vir mekaar gesê: Wie kan dan gered word?

27 Maar IESO het hulle aangekyk en geantwoord: By mense is dit onmoontlik, maar nie by Aleim nie; want by Aleim is alle dinge moontlik.

28 Toe begin Petrho vir Hom te sê: Kyk, ons het alles verlaat en U gevolg.

29 En IESO antwoord en sê: Amen Ek sê vir julle, daar is niemand wat huis of broers of susters of vader of moeder of vrou of kinders of grond ter wille van My en van die Blye Tyding verlaat het nie,

30 of hy ontvang nou in hierdie tyd honderd maal soveel: huise en broers en susters en moeders en kinders en grond, saam met vervolginge, en in die eeu wat kom, die ewige lewe.

31 Maar baie wat eerste is, sal laaste wees, en die wat laaste is, eerste.

Die vraag van die seuns van Zebedaio.

(Matthaio. 20: 17-28; Louka. 18: 31-34)

32 En hulle was op die pad terwyl hulle opgaan na Jerusalem,

en IESO het voor hulle uit gegaan, en hulle was verbaas; en terwyl hulle volg, het hulle gevrees. En Hy het weer die twaalf by Hom geneem en aan hulle begin vertel die dinge wat met Hom sou gebeur.

33 Kyk, sê Hy, ons gaan op na Jerusalem, en die Seun van die mens sal oorgelewer word aan die owerpriesters en die skrifgeleerdes, en hulle sal Hom tot die dood veroordeel en Hom oorlewer aan die nasies;

34 en hulle sal Hom bespot en Hom gésel en op Hom spuug en Hom doodmaak; en op die derde dag sal Hy opstaan.

35 En Iakobo en Ioanne, die seuns van Zebedaio, het na Hom gekom en gesê: Regeerder, ons wil hê dat U vir ons moet doen wat ons U ook al mag vra.

36 En Hy sê vir hulle: Wat wil julle hê moet Ek vir julle doen?

37 En hulle antwoord Hom: Gee aan ons dat ons mag sit in U heerlikheid, een aan U regter— en een aan U linkerhand.

38 Maar IESO sê vir hulle: Julle weet nie wat julle vra nie. Kan julle die beker drink wat Ek drink, en gedoop word met die doop waarmee Ek gedoop word?

39 En hulle antwoord Hom: Ons kan. Maar IESO sê vir hulle: Dis waar, die beker wat Ek drink, sal julle drink, en met die doop waarmee Ek gedoop word, sal julle gedoop word;

40 maar om te sit aan My regter— en aan My linkerhand, berus nie by My om te gee nie, maar dit is vir hulle vir wie dit berei is.

41 En toe die tien dit hoor, begin hulle verontwaardig te word oor Iakobo en Ioanne.

42 Maar IESO het hulle na Hom geroep en vir hulle gesê: Julle weet dat die wat gereken word as owerstes van die nasies, oor hulle heers, en dat hulle groot manne oor hulle gesag uitoefen;

43 maar so moet dit onder julle nie wees nie, maar elkeen wat onder julle groot wil word, moet julle dienaar wees.

44 En elkeen wat onder julle die eerste wil word, moet almal se dienskneg wees.

45 Want die Seun van die mens het ook nie gekom om gedien te word nie, maar om te dien en Sy lewe te gee as 'n losprys vir baie.

Die blinde man van Jérigo.

(Matthaio. 20: 29-34; Louka. 18: 35-43)

46 En hulle het in Jérigo gekom. En toe Hy en Sy dissipels en 'n aansienlike skare uit Jérigo uitgaan, sit die blinde man, Bartimaio, die seun van Timaio, langs die pad en bedel.

47 En toe hy hoor dat dit IESO die Nasaréner was, begin hy om uit te roep en te sê: Seun van Daudid, IESO, wees my barmhartig!

48 En baie het hom bestraf, dat hy moet stilbly; maar hy het al harder uitgeroep: Seun van Daudid, wees my barmhartig!

49 Toe gaan IESO staan en sê dat hy geroep moes word; en hulle roep die blinde man en sê vir hom: Hou goeie moed, staan op! Hy roep jou.

50 En hy gooi sy oorkleed af, staan op en kom na IESO toe.

51 En IESO antwoord en sê vir hom: Wat wil jy hê moet Ek vir jou doen? En die blinde man sê vir Hom: Rabbóni, dat ek

mag sien.

52 En IESO sê vir hom: Gaan, jou geloof het jou gered. En dadelik het hy gesien en IESO op die pad gevolg.

Intog van IESO in Jerusalem.

(Matthaio. 21: 1-11; Louka. 19: 29-38)

11 En toe hulle naby Jerusalem kom, by Bétfagé en Betánië, aan die Olyfberg, stuur Hy twee van Sy dissipels uit

2 en sê vir hulle: Gaan na daardie dorp reg voor julle; en dadelik as julle daar inkom, sal julle 'n eselsvul vind wat vasmag is, waar geen mens op gesit het nie. Maak hom los en bring hom.

3 En as iemand vir julle sê: Waarom doen julle dit? moet julle antwoord: die Regeerder het hom nodig; en dadelik sal hy hom hierheen stuur.

4 En hulle het gegaan en die vul by die deur, buite op die straat, vasmag gevind en hom losgemaak.

5 Daarop sê sommige van die wat daar staan, vir hulle: Wat maak julle dat julle die vul losmaak?

6 En hulle antwoord hul soos IESO beveel het. Toe laat hulle hul begaan.

7 En hulle het die vul na IESO gebring en hulle klere daarop gelê, en Hy het op hom gaan sit.

8 Toe gooi baie mense hulle klere op die pad oop, en ander kap takke van die bome af en strooi dit op die pad.

9 En die wat voor geloop en die wat gevolg het, het uitgeroep en gesê: Hosanna! Geseënd is Hy wat kom in die Naam van die Regeerder!
Psalm. 118:26 LXX & MT

10 Geseënd is die koninkryk wat kom in die Naam van die Regeerder, die koninkryk van ons vader Daudid! Hosanna in die hoogste hemele!

11 En IESO het in Jerusalem gekom en in die tempel. En nadat Hy alles rondom bekyk het, en omdat dit al aand was, het Hy met die twaalf uitgegaan na Betánië.

Die verdroogde vyeboom.

(Matthaio. 21: 18-22)

12 En die volgende dag, onderwyl hulle uit Betánië gaan, het Hy honger gehad;

13 en toe Hy op 'n afstand 'n vyeboom met blare sien, het Hy daarheen gegaan in die hoop om iets daaraan te vind; en toe Hy daarby kom, vind Hy niks as blare nie, want dit was nie die tyd van vye nie.

14 En IESO spreek en sê vir hom: Laat niemand ooit in der ewigheid van jou 'n vrug eet nie! En Sy dissipels het dit gehoor.

15 En hulle het in Jerusalem gekom; en toe IESO in die tempel ingaan, begin Hy om die wat in die tempel verkoop en koop, uit te jaag; en die tafels van die geldwisselaars en die stoele van die duiweverkopers het Hy omgegooi;

16 en Hy het niemand toegelaat om enige voorwerp deur die tempel te dra nie.

17 En Hy het geleer en vir hulle gesê: Is daar nie geskrywe: My huis moet 'n huis van gebed genoem word vir al die nasies nie? Maar julle het dit 'n rowerspelonk gemaak.

Esaia. 56:7; Ierhmeia. 7:11 LXX & MT

18 En die skrifgeleerdes en die owerpriesters het dit gehoor en gesoek hoe hulle Hom kon ombring; want hulle was bang vir Hom, omdat die hele skare verslae was oor Sy leer.

19 En toe dit laat word, het Hy uitgegaan buitekant die stad.

20 En toe hulle vroeg in die môre verbygaan, sien hulle die vyeboom, verdroog van die wortels af.

21 En Petrho het onthou en vir Hom gesê: Rabbi, kyk, die vyeboom wat U vervloek het, is verdroog.

22 IESO antwoord en sê vir hulle: Julle moet geloof in Aleim hê.

23 Want, Amen Ek sê vir julle dat elkeen wat vir hierdie berg sê: Hef jou op enwerp jou in die see—en nie in sy hart twyfel nie, maar glo dat wat hy sê, sal gebeur—hy sal verkry net wat hy sê.

24 Daarom sê Ek vir julle: Alles wat julle in die gebed vra, glo dat julle dit sal ontvang, en julle sal dit verkry.

25 En wanneer julle staan en bid, vergeef as julle iets teen iemand het, sodat julle Vader wat in die hemele is, ook julle jul oortredinge mag vergewe.

26 Maar as julle nie vergewe nie, sal julle Vader wat in die hemele is, ook julle oortredinge nie vergewe nie.

Die Doop van Ioanne.

(Matthaio. 21: 23-27; Louka. 20: 1-8)

27 En hulle het weer in Jerusalem gekom. En terwyl Hy in die tempel rondwandel, kom die owerpriesters en die skrifgeleerdes en die ouderlinge na Hom

28 en sê vir Hom: Deur watter gesag doen U hierdie dinge, en wie het U dié gesag gegee om dit te doen?

29 En IESO antwoord en sê vir hulle: Ek sal julle ook een ding vra, en antwoord julle My, dan sal Ek julle vertel deur watter gesag Ek hierdie dinge doen.

30 Die doop van Ioanne, was dit uit die hemel of uit mense? Antwoord My.

31 En hulle het by hulleself geredeneer en gesê: As ons sê: Uit die hemel—sal Hy sê: Waarom het julle hom dan nie geglo nie?

32 Maar as ons sê: Uit mense—dan was hulle vir die volk bang, want almal het gedink dat Ioanne werklik 'n profeet was.

33 En hulle antwoord en sê vir IESO: Ons weet nie. En IESO antwoord en sê vir hulle: Dan vertel Ek julle ook nie deur watter gesag Ek hierdie dinge doen nie.

Gelykenis van die Bose Landbouers.

(Matthaio. 21: 33-46; Louka. 20: 9-18)

12 Toe begin Hy deur gelykenisse vir hulle te sê:

'n Man het 'n wingerd geplant en 'n heining daarom gesit en 'n parskuip gegrawe en 'n wagtoring gebou, en hy het dit aan landbouers verhuur en op reis gegaan.

Esaia. 5:1, 2 LXX & MT

2 En op die regte tyd het hy 'n dienskneg na die landbouers gestuur om van die landbouers uit die vrug van die wingerd te ontvang;

3 maar hulle het hom geneem en geslaan en hom met leë hande weggestuur.

4 En weer het hy 'n ander dienskneg na hulle gestuur; en hom het hulle gestenig en aan die hoof gewond, hom skandelik behandel en teruggestuur.

5 En weer het hy 'n ander een gestuur, en hom het hulle doodgemaak; ook baie ander—sommige het hulle geslaan en ander doodgemaak.

6 Hy het toe nog een seun gehad, sy geliefde, en hom die laaste na hulle gestuur en gesê: Hulle sal my seun ontsien.

7 Maar daardie landbouers het by hulleself gesê: Dit is die erfgenaam; kom laat ons hom doodmaak, en die erfdeel sal ons s'n wees.

8 En hulle het hom geneem en doodgemaak en buitekant die wingerd uitgewerp.

9 Wat sal die eienaar van die wingerd dan doen? Hy sal kom en die landbouers ombring en die wingerd aan ander gee.

10 Het julle nie ook hierdie Skrifwoord gelees nie:

Die steen wat die bouers verwerp het, dit het 'n hoeksteen geword?

11 Hy het van IEOUE gekom en is wonderbaar in ons oë.

Psalm 118:22, 23; LXX & MT

12 En hulle het probeer om Hom in die hande te kry, maar was bang vir die skare, want hulle het begryp dat Hy die gelykenis met die oog op hulle uitgespreek het. Daarop het hulle Hom verlaat en weggegaan.

Die vraag oor die belasting.

(Matthaio. 22: 15-22; Louka. 20: 20-26)

13 Toe stuur hulle na Hom sommige van die Fariseërs en van die Erhodiane om Hom op 'n woord te betrap.

14 En hulle kom en sê vir Hom: Regeerder, ons weet dat U waaragtig is en U aan niemand steur nie; want U sien nie die persoon van mense aan nie, maar U leer die weg van Aleim in waarheid. Is dit geoorloof om aan die keiser belasting te betaal of nie? Moet ons betaal of moet ons nie betaal nie?

15 Maar Hy het hulle geveinsdheid geken en vir hulle gesê: Waarom versoek julle My? Bring vir My 'n penning, dat Ek dit kan sien.

16 En hulle het dit gebring. En Hy sê vir hulle: Wie se beeld en opskrif is dit? En hulle antwoord Hom: Die keiser s'n.

17 Toe antwoord IESO en sê vir hulle: Betaal aan die keiser wat die keiser toekom, en aan Aleim wat Aleim toekom. En hulle was verwonderd oor Hom.

Die Sadduseërs en die Opstanding.

(Matthaio. 22: 23-33; Louka. 20: 27-40)

18 Toe kom daar Sadduseërs na Hom, die wat sê dat daar geen opstanding is nie, en hulle vra Hom en sê:

19 Regeerder, MoUse het ons voorgeskrywe: As iemand se broer sterwe en 'n vrou agterlaat en geen kinders nalaat nie, moet sy broer sy vrou neem en kinders vir sy broer verwek.
5de MoUse. 25:5 LXX & MT

20 Nou was daar sewe broers, en die eerste het 'n vrou geneem en gesterwe sonder om kinders na te laat.

21 En die tweede het haar geneem en gesterwe, en hy het ook geen kinders nagelaat nie; en die derde net so.

22 En al sewe het haar geneem en geen kinders nagelaat nie. Laaste van almal het die vrou ook gesterwe.

23 In die opstanding dan, wanneer hulle opstaan, wie van hulle se vrou sal sy wees? —want al sewe het haar as vrou gehad.

24 En IESO antwoord en sê vir hulle: Is dit nie daarom dat julle dwaal dat julle die Skrifte en ook die krag van Aleim nie ken nie?

25 Want wanneer hulle uit die dode opstaan, trou hulle nie en word hulle nie in die huwelik uitgegee nie, maar is soos engele wat in die hemele is.

26 En wat die dode betref, dat hulle opstaan—het julle nie gelees in die boek van MoUse, in die gedeelte oor die doringbos, hoe Aleim vir hom gesê het: Ek is die Aleim van Abrhaam en die Aleim van Isaak en die Aleim van Jakob nie?

2de MoUse. 3:6 LXX & MT

27 Aleim is nie 'n Aleim van dooies nie, maar 'n Aleim van lewendes. Julle dwaal dus grootliks.

Die groot Gebod.

(Matthaio. 22: 34-40)

28 En toe een van die skrifgeleerdes wat bygekom het, hulle hoor redetwis, en wis dat Hy hulle goed geantwoord het, vra hy vir Hom: Wat is die eerste gebod van almal?

29 En IESO antwoord hom: Die eerste van al die gebooe is: Hoor, Israel, IEOUE, onse Aleim, is 'n enige Regeerder;

30 en jy moet IEOUE jou Aleim liefhê uit jou hele hart en uit jou hele siel en uit jou hele verstand en uit jou hele krag. Dit is die eerste gebod.

5de MoUse. 6:4, 5

31 En die tweede, hieraan gelyk, is dit: Jy moet jou naaste liefhê soos jouself. Daar

is geen ander gebod groter as dié nie.

3de MoUse. 19:18

32 En die skrifgeleerde sê vir Hom: Goed, Regeerder, U het met waarheid gesê dat Aleim een is *5de MoUse. 6:4, 5* en daar geen ander is as Hy nie; *5de MoUse. 4:35 LXX & MT*

33 en om Hom lief te hê uit die hele hart en uit die hele verstand en uit die hele siel en uit die hele krag, *5de MoUse. 6:4, 5* en om die naaste lief te hê soos jouself, *3de MoUse. 19:18* is meer as al die brandoffers en die slagoffers.

34 Toe IESO sien dat hy verstandig geantwoord het, sê Hy vir hom: Jy is nie ver van die koninkryk van Aleim nie. En niemand het dit meer gewaag om Hom vrae te stel nie.

Die Gesalfde, Seun van Daud.

(Matthaio. 22: 41-46; Louka. 20: 41-44)

35 En terwyl IESO in die tempel leer, antwoord Hy en sê: Hoe sê die skrifgeleerdes dat die Gesalfde die Seun van Daud is?

36 Want Daud self het deur die Heilige Gees gesê: IEOUE het tot my Regeerder gespreek: Sit aan My regterkant totdat Ek U vyande gemaak het 'n voetbank van U voete.

LXX-Psalm. 109:1; MT-110:1

37 Daud self noem Hom dus Regeerder; waarvandaan is Hy dan sy Seun? En die groot menigte het graag na Hom geluister.

Waarskuwing teen die skrifgeleerdes.

(Matthaio. 23: 1-39; Louka. 20: 45-47)

38 En Hy het aan hulle in Sy onderrig gesê: Pas op vir die skrifgeleerdes wat graag in lang klere rondloop en van begroetinge op die markte hou

39 en van die voorste banke in die sinagoges en die voorste plekke by die maaltje—

40 hulle wat die huise van die weduwees opeet en vir die skyn lang gebede doen. Hulle sal 'n swaarder oordeel ontvang.

Die Aalmoes van die arm Weduwee.

(Louka. 21: 1-4)

41 En IESO het reg voor die skatkis gaan sit en gekyk hoe die skare geld in die skatkis gooi. En baie rykes het veel ingegooi.

42 En daar kom een arm weduwee en gooi twee geldstukkies in, dit is 'n oortjie.

43 Toe roep Hy Sy dissipels na Hom en sê vir hulle: Amen Ek sê vir julle, hierdie arm weduwee het meer ingegooi as almal wat in die skatkis gegooi het.

44 Want hulle het almal uit hulle oorfloed ingegooi; maar sy het uit haar gebrek ingegooi alles wat sy gehad het, haar hele lewensonderhoud.

IESO Profeteer oor die Val van die Tempel.

(Matthaio. 24: 1-14; Louka. 21: 5-36)

13 En toe Hy uit die tempel uitgaan, sê een van Sy dissipels vir Hom: Regeerder, kyk watter klippe en watter geboue!

2 En IESO antwoord en sê vir hom: Sien jy hierdie groot geboue? Daar sal sekerlik nie een klip op die ander gelaat word wat nie afgebreek sal word nie!

3 En toe Hy gaan sit het op die Olyfberg, regoor die tempel, vra Petrho en Jakobob en Ioanne en Andrhea Hom afsonderlik:

4 Vertel ons, wanneer sal hierdie dinge wees, en wat is die teken wanneer al hierdie dinge volbring word?

5 En IESO antwoord hulle en begin te sê: Pas op dat niemand julle mislei nie.

6 Want baie sal onder My Naam kom en sê: Dit is Ek! En hulle sal baie mense mislei.

7 Maar wanneer julle hoor van oorloë en gerugte van oorloë, moet julle nie verskrik word nie, want dit moet kom. Maar dit is nog nie die einde nie.

8 Want die een nasie sal teen die ander opstaan, en die een koninkryk teen die ander; en daar sal aardbewings wees op verskillende plekke, en daar sal hongersnode wees en beroeringe. Hierdie dinge is 'n begin van die smarte.

9 Maar wees julle vir julleself op die hoede, want hulle sal julle oorlewer aan regbanke, en in sinagoges sal julle geslaan word en voor goewerneurs en konings gebring word om My ontwil, vir hulle tot 'n getuienis.

10 En die Blye Tyding moet eers aan al die nasies verkondig word.

11 En wanneer hulle jul weglei om julle oor te lewer, moenie julle vooraf kwel oor wat julle sal spreek nie, en moenie daaroor dink nie; maar wat julle in dié uur gegee word, dit moet julle spreek; want dit is nie julle wat spreek nie, maar die Heilige Gees.

12 En die een broer sal die ander tot die dood oorlewer, en die vader sy kind, en die kinders sal teen hulle ouers opstaan en hulle doodmaak.

13 En julle sal deur almal gehaat word ter wille van My Naam. Maar wie volhard tot die einde toe, hy sal gered word.

Die Profetiese rede. Die groot Verdrukking.

(Matthaio. 24: 15-28)

14 En wanneer julle die gruwel van die verwoesting, waarvan gespreek is deur die profeet Daniël, sien staan waar dit nie behoort nie—laat hom wat lees, oplet—dan moet die wat in Judéa is, na die berge vlug;

Danuel. 11:31; 12:11 LXX & MT

15 en wie op die dak is, moet nie afkom in die huis en ook nie ingaan om iets uit sy huis weg te neem nie;

16 en wie op die land is, moet nie omdraai na wat agter is om sy kleed weg te neem nie.

17 Maar wee die vroue wat swanger is en die wat nog soog, in

daardie dae!

18 En bid dat julle vlug nie in die winter mag plaasvind nie.

19 Want daardie dae sal daar 'n verdrukking wees soos daar nie gewees het van die begin van die skepping af wat Aleim geskape het tot nou toe, en ook nooit sal wees nie.

20 En as die Regeerder dié dae nie verkort het nie, sou geen vlees gered word nie; maar ter wille van die uitverkorenes wat Hy uitverkies het, het Hy dié dae verkort.

21 En as iemand dán vir julle sê: Kyk, hier is die Gesalfde! of: Kyk, daar! —moet dit nie glo nie.

22 Want daar sal valse gesalfdes en valse profete opstaan, en hulle sal tekens en wonders doen om, as dit moontlik was, ook die uitverkorenes te mislei.

23 Maar julle moet op jul hoede wees. Kyk, Ek het alles vir julle vooruit gesê.

Die Profetiese rede.

Wederkoms van die Seun van die mens.

(Matthaio. 24: 29-35)

24 Maar in daardie dae, ná dié verdrukking, sal die son verduister word, en die maan sal sy glans nie gee nie,

25 en die sterre van die hemel sal val, en die kragte wat in die hemele is, sal geskud word.

26

En dan sal hulle die Seun van die mens op die wolke sien kom met groot krag en heerlijkheid.

Danuel. 7:13 LXX & MT

27 En dan sal Hy Sy engele uitstuur, en Hy sal Sy uitverkorenes uit die vier windstreke versamel, van die einde van die aarde af tot by die einde van die hemel.

28 En leer van die vyeboom hierdie gelykenis: Wanneer sy tak al sag word en sy blare uitbot, weet julle dat die somer naby is.

29 So weet julle ook, wanneer julle hierdie dinge sien gebeur, dat dit naby is, voor die deur.

30 Amen Ek sê vir julle, hierdie geslag sal sekerlik nie verbygaan voordat al hierdie dinge gebeur het nie.

31 Die hemel en die aarde sal verbygaan, maar My woorde sal nooit verbygaan nie.

32 Maar van daardie dag en dié uur weet niemand nie, ook nie die engele in die hemel of die Seun nie, maar net die Vader.

Die Profetiese rede. Die waaksaamheid.

(Matthaio. 24: 36-44)

33 Pas op, waak en bid, want julle weet nie wanneer die tyd daar is nie.

34 Dit is soos 'n man wat op reis is, wat sy huis agtergelaat en sy diensknegte volmag gegee het, en vir elkeen sy werk, en aan die deurwagter bevel gegee het om te waak.

35 Waak dan, want julle weet nie wanneer die eienaar van die huis kom nie: in die aand of middernag of met die haangekraai of vroeg in die môre nie;

36 dat hy nie miskien skielik kom en julle aan die slaap vind

nie.

37 En wat Ek vir julle sê, sê Ek vir almal: Waak!

Die Regeerder se Pasga en die Begin van Sy Lyding. Die owerpriesters hou Raad.

(Matthaio. 26: 1-5; Louka. 22: 1,2; Ioanne. 11: 47-57)

14 En die pasga en die fees van die ongesuurde brode sou oor twee dae wees; en die owerpriesters en die skrifgeleerdes het gesoek hoe hulle Hom met lis gevange kon neem en doodmaak.

2 Maar hulle het gesê: Nie op die fees nie, sodat daar nie miskien 'n oproer onder die volk kom nie.

Die maaltyd in Betánië.

(Matthaio. 26: 6-13; Louka. 7: 36-50; Ioanne. 12: 1-8)

3 En toe Hy in Betánië was, in die huis van Simon, die melaatse, terwyl Hy aan tafel was, kom daar 'n vrou met 'n albaste fles met egte, baie kosbare nardussalf; en sy breek die albaste fles en gooi dit op Sy hoof uit.

4 En daar was sommige wat by hulleself verontwaardig was en gesê het: Waarvoor het hierdie verkwisting van die salf plaasgevind?

5 Want dit kon vir meer as drie honderd pennings verkoop en die geld aan die armes gegee geword het. En hulle het teen haar uitgevaar.

6 Maar IESO sê: Laat haar staan; waarom val julle haar lastig? Sy het 'n goeie werk aan My gedoen.

7 Want die armes het julle altyd by julle, en wanneer julle wil, kan julle aan hulle goed doen; maar My het julle nie altyd nie.

8 Wat sy kon, het sy gedoen. Sy het vooruit al My liggaam vir die begrafnis gesalf.

9 Amen Ek sê vir julle, oral waar hierdie Blye Tyding oor die hele wêreld verkondig word, daar sal ook gesprek word van wat sy gedoen het, tot 'n gedagtenis aan haar.

Die loon van die verraad.

(Matthaio. 26: 14-16; Louka. 22: 3-6)

10 En Iouda Iskariot, een van die twaalf, het na die owerpriesters gegaan om Hom aan hulle oor te lewer.

11 En toe hulle dit hoor, was hulle bly en het belowe om hom geld te gee. En hy het na 'n goeie geleentheid gesoek om Hom oor te lewer.

Die laaste pasga. Die heilige Nagmaal.

(Matthaio. 26: 17-30; Louka. 22: 7-23; 1 Korinthiers 11: 23-29)

12 En op die eerste dag van die ongesuurde brode, wanneer hulle gewoonlik die pasga geslag het, sê Sy dissipels vir Hom: Waar wil U hê moet ons gaan klaarmaak, dat U die pasga kan eet?

13 En Hy stuur twee van Sy dissipels en sê vir hulle: Gaan na die stad toe; en 'n man wat 'n kruik water dra, sal julle tegemoetkom. Volg hom,

14 en waar hy ook mag ingaan, moet julle vir die eienaar van die huis sê: Die Regeerder laat weet: Waar is die kamer waar Ek met My dissipels die pasga kan eet?

15 En hy sal julle 'n groot bovertrek wys, in gereedheid gebring. Daar moet julle vir ons klaarmaak.

16 En Sy dissipels het gegaan en in die stad gekom en dit gevind soos Hy vir hulle gesê het; en hulle het die pasga voorberei.

17 En toe dit aand geword het, kom Hy met die twaalf.

18 En terwyl hulle aan tafel was en eet, sê IESO: Amen Ek sê vir julle, een van julle sal My verrai, een wat saam met My eet.

19 Toe het hulle begin om bedroef te word en een vir een aan Hom te sê: Is dit miskien Ek? En 'n ander een: Is dit miskien ek?

20 En Hy antwoord en sê vir hulle: Dit is een van die twaalf wat saam met My sy hand in die skottel insteek.

21 Die Seun van die mens gaan wel heen soos daar van Hom geskrywe is; maar wee daardie man deur wie die Seun van die mens verrai word! Dit sou vir hom goed gewees het as daardie man nie gebore was nie.

22 En terwyl hulle eet, neem IESO brood, en nadat Hy gedank het, breek Hy dit en gee dit aan hulle en sê: Neem, eet, dit is My liggaam.

23 Toe neem Hy die beker, en nadat Hy gedank het, gee Hy dit aan hulle, en hulle het almal daaruit gedrink.

24 En Hy sê vir hulle: Dit is My bloed, die bloed van die nuwe testament, wat vir baie uitgestort word.

25 Amen Ek sê vir julle, Ek sal nooit meer van die vrug van die wynstok drink nie, tot op daardie dag wanneer Ek dit nuut sal drink in die koninkryk van Aleim.

26 En toe hulle die lofsang gesing het, het hulle uitgegaan na die Olyfberg.

Petrho gewaarsku.

(Matthaio. 26: 31-35; Louka. 22: 31-34; Ioanne. 13: 36-38)

27 Toe sê IESO vir hulle: Julle sal almal in hierdie nag aanstoot neem aan My; want daar is geskrywe: Ek sal die herder slaan, en die skape sal verstrooi word.

Zekaria. 13:7 LXX & MT

28 Maar nadat Ek opgestaan het, sal Ek voor julle uit na Galiléa gaan.

29 En Petrho sê vir Hom: Al sal almal ook aanstoot neem, dan tog nie ek nie.

30 Daarop sê IESO vir hom: Amen Ek sê vir jou, vandag, in hierdie nag, voordat die haan twee maal gekraai het, sal jy My drie maal verloën.

31 Maar hy het nog baie meer aangehou en gesê: Al moes ek saam met U sterwe, ek sal U nooit verloën nie! En net so het almal ook gesê.

IESO in Getsémané.

(Matthaio. 26: 36-46; Louka. 22: 39-46; Ioanne. 18: 1)

32 Toe kom hulle in 'n plek waarvan die naam Getsémané was. En Hy sê vir Sy dissipels: Sit hier onderwyl Ek gaan bid.

33 En Hy neem Petrho en Iakobo en Ioanne saam met Hom en begin ontsteld en benoud te word.

34 En Hy sê vir hulle: My siel is diep bedroef tot die dood toe; bly hier en waak.

35 En toe Hy 'n bietjie verder gegaan het, val Hy op die grond en bid dat, as dit moontlik was, dié uur by Hom sou verbygaan.

36 En Hy sê: Abba, Vader, alle dinge is vir U moontlik; neem hierdie beker van My weg; nogtans nie wat Ek wil nie, maar wat U wil.

37 En Hy kom en vind hulle aan die slaap en sê vir Petrho: Simon, slaap jy? Was jy nie in staat om een uur te waak nie?

38 Waak en bid, dat julle nie in versoeking kom nie. Die gees is wel gewillig, maar die vlees is swak.

39 Hy gaan toe weer weg en bid dieselfde woorde.

40 En toe Hy terugkom, vind Hy hulle weer aan die slaap, want hulle oë was swaar; en hulle het nie geweet wat om Hom te antwoord nie.

41 En Hy kom vir die derde keer en sê aan hulle: Slaap maar voort en rus. Dit is genoeg; die uur het gekom. Kyk, die Seun van die mens word oorgelewer in die hande van die sondaars.

42 Staan op, laat ons gaan; kyk, hy is naby wat My verrai.

IESO word gevange geneem.

(Matthiaio. 26: 47-56; Louka. 22: 47-33; Ioanne. 18: 2-11)

43 En dadelik, terwyl Hy nog spreek, verskyn Iouda wat een van die twaalf was, en saam met hom 'n groot menigte met swaarde en stokke, gestuur deur die owerpriesters en die skrifgeleerdes en die ouderlinge.

44 En Sy verrai het 'n teken met hulle afgespreek en gesê: Die een wat ek sal soen—dit is Hy; gryp Hom en neem Hom met sekerheid weg.

45 En toe hy kom, gaan hy dadelik na Hom en sê: Rabbi, Rabbi! en soen Hom.

46 Daarop slaan hulle hul hande aan Hom en gryp Hom.

47 En een van die wat daar gestaan het, het sy swaard uitgetrek en die dienskneg van die grootpriester geslaan en sy oor afgekap.

48 En IESO antwoord en sê vir hulle: Het julle soos teen 'n rower uitgetrek met swaarde en stokke om My gevange te neem?

49 Dag vir dag was Ek by julle in die tempel besig om te leer, en julle het My nie gegryp nie. Maar die Skrifte moes vervul word.

50 Toe het almal Hom verlaat en gevlug.

51 En 'n sekere jongman met 'n linnedoek om sy naakte lyf het Hom gevolg; en die jongmanne het hom gegryp;

52 maar hy het die linnedoek laat staan en naak van hulle weggevlug.

IESO voor die Joodse Raad.

(Matthiaio. 26: 57-68; Louka. 22: 63-71; Ioanne. 18: 12-27)

53 En hulle het IESO weggelei na die grootpriester. En al die owerpriesters en die ouderlinge en die skrifgeleerdes het by hom vergader.

54 En Petrho het Hom van ver af gevolg tot binne-in die paleis van die grootpriester, en het saam met die dienaars gesit en hom by die vuur warm gemaak.

55 En die owerpriesters en die hele Raad het getuienis teen IESO gesoek om Hom dood te maak, en hulle het niks gevind

nie;

56 want baie het vals teen Hom getuig en die getuienisse was nie eenders nie.

57 En sommige het opgestaan en vals teen Hom getuig en gesê:

58 Ons het Hom hoor sê: Ek sal hierdie tempel wat met hande gemaak is, afbreek en in drie dae 'n ander een opbou wat nie met hande gemaak is nie.

59 En selfs so was hulle getuienis nie eenders nie.

60 Toe staan die grootpriester in hul midde op en vra IESO en sê: Antwoord U niks nie? Wat getuig hierdie manne teen U?

61 Maar Hy het stilgebly en geen antwoord gegee nie. Weer stel die grootpriester Hom die vraag en sê vir Hom: Is U die Gesalfde, die Seun van die geseënde Aleim?

62 En IESO sê: Ek is. En u almal sal die Seun van die mens aan die regterkant van die krag van Aleim sien sit en kom met die wolke van die hemel.

Psalms. 110:1; Danuel. 7:13 LXX & MT

63 Toe skeur die grootpriester sy klere en sê: Wat het ons nog getuies nodig!

64 Julle het die Hemeltergend gehoor; wat dink julle? En hulle het almal Hom veroordeel dat Hy die dood skuldig was.

65 En sommige het begin om op Hom te spuug en Sy aangesig toe te maak en Hom met die vuus te slaan en vir Hom te sê: Profeteer! En die dienaars het Hom met stokke geslaan.

IESO deur Petrho verloën.

(Matthiaio. 26: 69-75; Louka. 22: 54-62; Ioanne. 18: 15-18, 25-27)

66 En terwyl Petrho onder in die binneplaas was, kom daar een van die diensmeisies van die grootpriester,

67 en toe sy Petrho sien, besig om hom warm te maak, kyk sy na hom en sê: Jy was ook by die Nasaréner, IESO.

68 Maar hy het dit ontken en gesê: Ek weet nie en begryp nie wat jy sê nie. En hy het buite na die voorplein gegaan; en die haan het gekraai.

69 En toe die diensmeisie hom weer sien, begin sy aan die wat daar staan, te sê: Hierdie man behoort by hulle.

70 Maar hy het dit weer ontken. En 'n bietjie later weer sê die wat daar staan vir Petrho: Waarlik, jy behoort by hulle, want jy is ook 'n Galiléër en jou spraak is net so.

71 Toe begin hy homself te verwens en te sweer: Ek ken nie daardie man van wie julle praat nie.

72 En vir die tweede keer het die haan gekraai; en Petrho het die woord onthou wat IESO vir hom gesê het: Voor die haan twee maal gekraai het, sal jy My drie maal verloën. En hy het in tranes uitgebars.

IESO word Verhoor en word vasgespyker.

(Matthiaio. 27: 11-31; Louka. 23: 1-25; Ioanne. 18: 28-40; 19:1-16)

15 En dadelik, vroeg in die môre, het die owerpriesters saam met die ouderlinge en skrifgeleerdes en die hele Raad 'n besluit geneem; en nadat hulle IESO geboei het, het hulle Hom weggelei en aan Pilato oorgelewer.

2 En Pilato het Hom gevra: Is U die Koning van die Jode? En Hy het geantwoord en vir hom gesê: U sê dit.

3 En die owerpriesters het baie beskuldiging teen Hom ingebring.

4 En Pilato het Hom weer gevra en gesê: Antwoord U niks nie? Kyk hoe baie getuienisse hulle teen U inbring.

5 Maar IESO het niks meer geantwoord nie, sodat Pilato hom verwonder het.

6 En op die fees was hy gewoon om een gevangene, die een wat hulle gevra het, vir hulle los te laat.

7 En daar was 'n sekere Barhabba wat met mede-oproermakers in die gevangenis was; en hulle het in die opstand 'n moord begaan.

8 En die skare het geskreeu en begin vra dat hy vir hulle sou doen soos altyd.

9 Toe antwoord Pilato en sê vir hulle: Wil julle hê dat ek vir julle die Koning van die Jode moet loslaat?

10 Want hy het geweet dat die owerpriesters Hom uit nydigheid oorgelewer het.

11 Maar die owerpriesters het die skare aangehits dat hy liewer Barhabba vir hulle moes loslaat.

12 Toe antwoord Pilato weer en sê vir hulle: Wat wil julle dan hê moet ek doen met Hom wat julle Koning van die Jode noem?

13 En hulle skreeu weer: Spyker Hom!

14 Maar Pilato sê vir hulle: Watter kwaad het Hy dan gedoen? Hulle skreeu toe nog harder: Spyker Hom!

15 En omdat Pilato aan die skare hulle sin wou gee, het hy Barhabba vir hulle losgelaat; en nadat hy IESO laat gésel het, het hy Hom oorgelewer om vas gespyker te word.

16 Toe lei die soldate Hom weg in die binneplaas, dit is die goewerneur se paleis, en hulle roep die hele leërafdeling bymekaar

17 en trek Hom 'n purperkleed aan en vleg 'n kroon van dorings en sit dit vir Hom op;

18 en hulle begin Hom begroet: Wees gegroet, Koning van die Jode!

19 En hulle slaan Hom met 'n riet op die hoof en spuug op Hom en val op die knieë en bring Hom hulde.

20 En toe hulle Hom bespot het, trek hulle Hom die purperkleed uit en trek Hom sy eie klere aan; en hulle lei Hom weg om Hom te spyker.

IESO word vasgespyker.

(Matthiao. 27: 32-56; Louka. 23: 50-56; Ioanne. 19: 38-42)

21 En hulle het 'n sekere Simon van Ciréne wat van die veld af gekom het, die vader van Alexandro en Rouphe, gedwing om Sy Paal te dra.

22 En hulle het Hom gebring op die plek Gólgota, dit is, as dit vertaal word: Plek van die Hoofskedel.

23 Toe gee hulle Hom wyn met mirre gemeng om te drink, maar Hy het dit nie geneem nie.

24 En nadat hulle Hom vas gespyker het, het hulle Sy klere verdeel deur die lot te werp oor wat elkeen moes kry.

Psalm. 22:18 LXX & MT

25 En dit was die derde uur toe hulle Hom vas gespyker het.

26 En die opskrif van Sy beskuldiging was bokant Hom geskrywe:

DIE KONING VAN DIE JODE.

27 Hulle het ook twee rowers saam met Hom vas gespyker, een aan Sy regter— en een aan Sy linkerkant.

28 En die Skrif is vervul wat sê: En Hy is by die misdadigers gereken.

Esai. 53:12 LXX & MT

29 En die verbygangers het Hom gesmaad, terwyl hulle hul hoof skud en sê: Ha, U wat die tempel afbreek en in drie dae opbou,

30 verlos Uself en kom af van die Paal!

31 En so het ook die owerpriesters saam met die skrifgeleerdes gespot en vir mekaar gesê: Ander het Hy verlos, Homself kan Hy nie verlos nie.

32 Laat die Gesalfde, die Koning van Israel, nou van die Paal afkom, sodat ons kan sien en glo! Ook die wat saam met Hom vas gespyker is, het Hom beledig.

33 En toe dit die sesde uur was, kom daar duisternis oor die hele aarde tot die negende uur toe.

34 En die negende uur het IESO met 'n groot stem uitgeroep en gesê: Eloï, Eloï, lamma sabachthani? wat, as dit vertaal word, beteken: My Aleim, My Aleim, waarom het U My verlaat?

Psalm. 22:1 LXX & MT

35 En sommige van die wat daar staan, hoor dit en sê: Kyk, Hy roep na Elia.

36 Toe hardloop een en maak 'n spons vol asyn en sit dit op 'n riet en laat Hom drink; en hy sê: Wag, laat ons sien of Elia kom om Hom af te haal.

Psalm. 69:21 LXX & MT

37 Maar IESO het met 'n groot stem geroep en die laaste asem uitgeblaas.

38 En die voorhangsel van die tempel het in twee geskeur van bo tot onder.

39 En toe die hoofman oor honderd wat daar reg voor Hom staan, sien dat Hy so uitgeroep en die laaste asem uitgeblaas het, sê hy: Waarlik, Hy was die Seun van Aleim.

40 En daar was ook vroue wat van ver af dit aanskou het. Onder hulle was Marhia Magdalene ook, en Marhia, die moeder van Iakobo, die kleine, en van Iose, en Salome —

41 hulle wat Hom gevolg en Hom gedien het toe Hy in Galiléa was—en baie ander vroue wat saam met Hom opgegaan het na Jerusalem.

IESO se Begrafnis.

(Matthaio. 27: 57-66; Louka. 23: 50-56; Ioanne. 19: 38-42)

42 En toe dit aand geword het, omdat dit die voorbereiding was, dit is die voorsabbat,

43 kom daar 'n vername raadslid, Ioseph van Arimathéa, wat self ook die koninkryk van Aleim verwag het; en hy waag dit om na Pilato in te gaan en die liggaam van IESO te vra.

44 En Pilato was verwonderd dat Hy al dood was, en hy het die hoofman oor honderd geroep en hom gevra of Hy al lank dood was.

45 En toe hy dit van die hoofman oor honderd verneem het, het hy die liggaam aan Ioseph geskenk.

46 En hy het linne gekoop, en Hom afgehaal en in die linne toegedraai, en Hom neergelê in 'n graf wat in 'n rots uitgekap was. En hy het 'n steen teen die opening van die graf gerol.

47 En Marhia Magdalene en Marhia, die moeder van Iose, het gesien waar Hy neergelê word.

Die Opstanding en Hemelvaart.

(Matthaio. 28: 1-10; Louka. 24: 1-12; Ioanne. 20: 1-18)

16 En toe die sabbat verby was, het Marhia Magdalene en Marhia, die moeder van Iakobo, en Salome speserye gekoop om Hom te gaan salf.

2 En baie vroeg op die eerste dag van die week, net ná sonop, kom hulle by die graf.

3 En hulle sê vir mekaar: Wie sal vir ons die steen voor die opening van die graf wegrol?

4 En toe hulle opkyk, sien hulle dat die steen weggerol was, want dit was baie groot.

5 En toe hulle in die graf ingegaan het, sien hulle 'n jongman, met 'n lang wit kleed om, aan die regterkant sit, en hulle het baie geskrik.

6 En hy sê vir hulle: Moenie verskrik wees nie. Julle soek IESO die Nasaréner wat vas gespyker is. Hy het opgestaan. Hy is nie hier nie. Dáár is die plek waar hulle Hom neergelê het.

7 Maar gaan sê vir Sy dissipels en vir Petrho dat Hy voor julle uit gaan na Galiléa. Daar sal julle Hom sien soos Hy vir julle gesê het.

8 Toe gaan hulle haastig uit en vlug van die graf af weg. En bewing en ontsetting het hulle aangegryp. En hulle het vir niemand iets gesê nie, want hulle het gevrees.

Verskyning van IESO na Sy Opstanding.

9 En nadat Hy opgestaan het, vroeg op die eerste dag van die week, het Hy eers verskyn aan Marhia Magdalene, uit wie Hy sewe duiwels uitgedryf het.

10 Sy het gegaan en dit vertel aan die wat saam met Hom gewees het, terwyl hulle treur en ween.

11 En toe hulle hoor dat Hy lewe en deur haar gesien is, het hulle dit nie geglo nie.

12 En hierna het Hy in 'n ander gedaante verskyn aan twee van hulle terwyl hulle loop, op pad in die veld.

13 Hulle het ook gegaan en dit aan die ander vertel, maar dié het hulle ook nie geglo nie.

14 Later het Hy aan die elf self verskyn toe hulle aan tafel was, en Hy het hulle hul ongelooft en hardheid van hart

verwyt, omdat hulle die wat Hom ná Sy opstanding gesien het, nie geglo het nie.

15 En Hy het vir hulle gesê: Gaan die hele wêreld in en verkondig die Blye Tyding aan die ganse mensdom.

16 Hy wat glo en hom laat doop, sal gered word; maar hy wat nie glo nie, sal veroordeel word.

17 En vir die wat geglo het, sal hierdie tekens volg: in My Naam sal hulle duiwels uitdryf, met nuwe tale sal hulle spreek,

18 slange sal hulle opneem; en as hulle iets dodeliks drink, sal dit hulle geen kwaad doen nie; op siekes sal hulle die hande lê, en hulle sal gesond word.

19 Nadat die Regeerder dan met hulle gespreek het, is Hy opgeneem in die hemel en het gaan sit aan die regterkant van Aleim.

Psalms. 110:1 LXX & MT

20 Maar hulle het uitgegaan en oral gepreek, en die Regeerder het saamgewerk en die woord bevestig deur die tekens wat daarop gevolg het. Amen.

